

東  
觀  
漢  
記

二







東觀漢記

(二)

班固等撰

編主五雲王

編初成集書叢

記 漢 觀 東  
冊 二

中華民國二十六年二月初版

撰 者 班 固 等

發 行 人 王 長 沙 南 正 街 雲 五

印 刷 所 商 務 印 書 館 長 沙 南 正 街

發 行 所 商 務 印 書 館 各 埠



# 東觀漢記卷十四

## 列傳九

朱鮪

朱鮪(案)范書岑彭傳鮪淮陽人

等會城南清水上。沙中設壇立聖公爲天子。鮪破。上大喜。諸將賀之。懇上尊號。鮪守

雒陽。吳漢諸將圍守數月不下。上以岑彭嘗爲鮪校尉。令彭說鮪曰。赤眉已得長安。今公誰爲守乎。蕭王受命平定燕趙。百姓安土歸心。賢俊四面雲集。今北方清淨。大兵來攻。雒保一城。欲何望乎。不如亟降。鮪曰。大司徒公被害時。鮪與其謀。又諫更始無遣上北伐。自知罪深。故不敢降耳。彭還詣河陽白上。上謂彭復往曉之。夫建大事者。不忌小怨。今降官爵可保。況誅罰乎。上指水曰。河水在此。吾不食言。彭奉上旨。復至城下說鮪。因曰。彭往者得執鞭侍從。蒙薦舉拔擢。深受厚恩。思以報義。不敢負公。鮪從城上下索曰。當如此來。彭趨索欲上。鮪見其不疑。卽曰。且蚤與我會上東門外。彭如期往。與鮪交馬語。鮪輕騎詣彭降焉。彭爲殺羊具食。鮪曰。身爲降虜。未見吳公諸將。不敢食。彭卽令鮪自縛。與俱見吳公。將詣行在所河津亭。上卽時解鮪縛。復令彭夜送歸雒陽。(案)范書岑彭傳鮪明且悉衆出降。拜爲平狄將軍。封扶溝侯。成德侯鮪玄孫祀。(案)范書不載鮪徙封成德。殺人國除。坐

鮑永

鮑永字君長。上黨人也。少有志操。事後母至孝。妻嘗於母前叱狗。而永卽去之。爲郡功曹。時有稱侍中止傳舍者。太守趙興欲出謁。永以不宜出。當車拔佩刀。〔案〕范書本傳作拔佩刀。截馬當胸。與此異。興因還。後數日。詔書下捕之。果矯稱使者。由是知名。更始以永行大將軍事。得置偏裨將五人。拜僕射。行將軍事。將兵安撫河東。性好文德。雖行將軍。常衣阜襜褕。路稱鮑尙書兵馬。光武遣諫議大夫儲大伯持節徵永。永疑不從。乃收繫大伯。封所持節於晉陽。傳舍壁中。遣信人馳至長安。永遣弟升及子壻張舒等謀使營尉李匡先反。涅城開門內兵。殺其縣長馮晏。立故謁者祝回爲涅長。更始歿。永與馮欽共罷兵。幅巾而居。後歸上。上謂永曰。我攻懷三日。兵不下。關東畏卿。且將故人往。卽拜永諫大夫。至懷。謂太守曰。足下所以堅不下者。未知孰是也。今聖主卽位。天下已定。不降何待。卽開城降。永說下懷。上大喜。與永對食。賜洛陽上商里宅。爲魯郡太守時。彭豐等不肯降。後孔子闕里。無故荆棘自闕。從講室掃除至孔里。永異之。召郡府丞謂曰。方今阨急。而闕里無故自滌。豈夫子欲令太守大行饗誅無狀也。乃修學校。理請豐等會。手格殺之。爲司隸校尉時。帝叔父趙王良從送中郎將來歛喪。還入夏城門中。與五官將軍相逢。道迫。良怒。召門候岑尊。叩頭馬前。永劾奏良曰。今月二十七日。車駕臨故中郎將來歛喪。還車駕過須臾。趙王從後到。與右中郎將張邯相逢。城門中道迫狹。叱邯旋車。又召候岑尊詰責。使前走數十步。案良諸侯藩臣。蒙恩入侍。宜知尊帝城門。

候吏六百石。而肆意加怒。令叩頭都道。奔走馬頭前。無藩臣之禮。大不敬也。永矜嚴公平。以平陵鮑恢爲都官從事。並伉直。不避強禦。詔策曰。貴戚且當斂手以避二鮑。其見憚如此。永行縣到京兆霸陵。過更始冢。引車入陌。欲下。從事諫止之。永曰。親北面事人。何忍車過其墓。雖以獲罪。司隸不避也。遂下車哭盡哀。而至右扶風。椎牛上苟諫冢。上聞之。問公卿曰。奉使如此。何如。太中大夫張堪對曰。仁者百行之宗。忠者禮義之主。仁不遺舊。忠不忘君。行之高者也。上悅。永以度田不實被徵。(案)范書本傳。詔書迎下。永曰。君晨夜冒犯霜露。精神亦已勞矣。以君帷幄近臣。其以爲兗州牧。

### 鮑昱

鮑昱。字文淵。(案)昱。永子。泚陽長邑人。趙堅殺人繫獄。其父母詣昱。自言年七十餘。惟有一子。適新娶。今繫獄當死。長無種類。涕泣求哀。昱憐其言。令將妻入獄。解械止宿。遂任身有子。拜司隸校尉。詔昱詣尙書。使封胡降檄。上遣小黃門問昱有所怪不。對曰。臣聞故事。通官不著姓。又當司徒露布。怪使司隸而著姓也。帝報曰。吾欲使天下知忠臣之子。復爲司隸。司徒例訟久者。至數十年。比例輕重。非其事類。錯雜難知。昱奏定詞訟七卷。決事都目八卷。以齊同法令。息遏人訟也。(案)范書本傳。昱以永平十七年爲司徒。

### 田邑

田邑。字伯玉。馮翊蓮芍人也。其先齊諸田。父豐。爲王莽著威將軍。邑有大節。涉學藝。能善屬文。初爲上黨

太守鄧禹使積弩將軍馮愨將兵繫邑。愨悉得邑母弟妻子。〔案〕范書馮衍傳。世祖遣劉延攻天井關。與田邑戰。邑迎母弟妻子爲延所獲。與此異。

後邑聞更始敗。乃歸世祖。世祖遣騎都尉弓里游諫大夫何叔武。卽拜邑爲上黨太守。時更始遣鮑永馮衍屯太原。衍與邑素誓。刎頸俱受重任。忿邑背前約。乃遣書責邑曰。晏嬰臨盟。擬以曲戟。不易其辭。邑以書勸鮑永曰。愚聞丈夫不釋故而改圖。哲士不徼幸而出危。今君長故主敗不能死。新主立不肯降。擁衆而據壁。欲襲六國之從。與邑同事一朝。內爲刎頸之盟。興兵背畔。攻取涅城。破君長之國。壞父母之鄉。首難結怨。輕弄凶器。人心難知。何意君長當爲此計。昔者韓信將兵。無敵天下。功不世出。略不再見。威執項羽。名出高帝。不知天時。就烹於漢。智伯分國。既有三晉。欲大無已。身死地分。頭爲飲器。君長銜命出征。擁帶徒士。上黨阨不能救。河東畔不能取。朝有顛沛之憂。國有分崩之禍。上無仇牧之節。下無不占之志。天之所壞。人不能支。君長將兵。不與韓信同日而論。威行得衆。不及智伯萬分之半。不見天時。不知厭足。欲明人臣之義。當先知故主之未然。欲貪天下之利。宜及新主之未爲。今故主已敗。新主旣成。四海爲羅網。天下爲敵人。舉足遇害。動搖觸患。履深淵之薄冰。不爲號。涉千鈞之發機。不知懼。何如其智也。絕鮑氏之姓。廢子都之業。誦堯之言。服桀之行。悲夫命也。張舒內行邪孽。不遵孝友。疎其父族。外附妻黨。已收三族。將行其法。能逃不自詣者舒也。能夷舒宗者予也。永邑遂結怨焉。邑爲漁陽太守。未到官。道病徵數。爲諫議大夫。病卒。



馮衍

馮衍字敬通其先上黨潞人曾祖父奉世徙杜陵祖野王生座襲父爵爲關內侯座生衍衍少有倣儻之志更始時爲偏將軍與鮑永相善更始既敗固守不以時下衍說吳漢曰得道之兵鼓不振塵(案)范書更始二年

吳漢爲大將軍斬更始幽州牧苗曾衍時爲更始立漢將軍建武初爲揚化大將軍掾辟鄧禹府數奏記於禹陳政言事曰衍聞明君

不惡切慤之言以測幽冥之論忠臣不顧爭引之患以達萬幾之變是故君臣兩興功名兼立名勒金石令問不忘今衍幸逢寬明之日將值危言之時豈敢拱默避罪而不竭其誠哉伏念天下離王莽之害久矣始自東郡之師繼以西海之役巴蜀沒於南夷緣邊破於北狄遠征萬里暴兵累年禍擊未解兵連不息刑法彌深賦斂愈重衆疆之黨橫擊於外百僚之臣貪殘於內元元無聊饑寒並臻父子流亡夫婦離散廬落丘墟田疇蕪穢疾疫大興災異蠶起於是江湖之上海岱之濱風騰波涌更相貽藉四垂之人肝腦塗地死亡之數不啻大半殃咎之毒痛入骨髓匹夫僮婦咸懷怨怒皇帝以聖德靈威龍興鳳舉率宛葉之衆將散亂之兵敵血昆陽長驅武關破百萬之陣摧九虎之軍雷震四海席卷天下攘除禍亂誅滅無道一葦之間海內大定繼高祖之休烈修文武之絕業社稷復存炎精更輝德冠往初功無與二天下曰以去亡新就聖漢當蒙其福而賴其願樹恩布德易以周洽其猶順驚風而飛鴻毛也然而諸將擄掠逆倫絕理殺人父子妻人婦女燔其室屋略其財產饑者毛食寒者裸跣冤結失望無所歸命今大將軍

以明淑之德。秉大使之權。統三軍之政。存撫并州之人。惠愛之誠。加乎百姓。高世之心。聞乎羣士。故其延頸企踵而望者。非特一人也。且大將軍之事。豈特圭璧其行。束脩其身而已哉。將定國家之大業。成天地之元功也。昔周宣中興之主。齊桓霸疆之君耳。猶有申伯召虎。夷吾吉甫。攘其蝥賊。安其疆宇。況乎萬里之漢。明帝復興。而大將軍爲之梁棟。此誠不可以忽也。且衍聞之。兵久則力屈。人愁則變生。今邯鄲之賊未滅。眞定之際復擾。而大將軍所部不過百里。守城不休。戰軍不息。兵革雲集。百姓驚駭。奈何自怠。不爲深憂。夫并州之地。東帶石陘關。北逼彊胡。年穀獨熟。人庶多資。斯四戰之地。攻守之場也。如其不虞。何以待之。故曰德不素積。人不爲用。備不豫具。難以應卒。今生人之命。懸於將軍。將軍所仗。必須良才。宜改易非任。更選賢能。夫十室之邑。必有忠信。無謂無賢。路有聖人。審得其人。以承大將軍之明。雖則山澤之人。無不感德。思樂爲用矣。然後簡精銳之卒。發屯守之士。三軍旣整。甲兵已具。相其土地之饒。觀其水泉之利。制屯田之術。習戰射之教。則威風遠暢。人安其業矣。若鎮太原。撫上黨。收百姓之歡心。樹名賢之良佐。天下無變。則足以顯聲譽。一朝有事。則可以建大功。惟大將軍開日月之明。發深淵之慮。監六經之論。觀孫武之策。省羣議之是非。詳衆士之白黑。以超周南之迹。垂甘棠之風。令夫功烈施於千載。富貴傳於無窮。伊望之策。何以加茲。〔案〕范書本傳以此奏記爲衍觀鮑永之詞與此異。衍娶北地任氏女爲妻。忌不得畜媵妾兒女。常自操并白。明帝以爲衍材過其實。抑而不用。遂坎壞失志。以素終於家。

馮豹

馮豹字仲文。〔案〕豹，後母惡之。嘗因豹夜臥，引刀斫之。豹正起，中被獲免。豹好儒學，以詩傳教授。鄉里爲

之語曰：道德斌斌馮仲文。豹每奏事未報，常伏省門下，或從昏至明。天子默使小黃門持被覆之，曰：勿驚

之。〔案〕范書本傳：此豹爲武威太守，視事二年，河西稱之。豹爲尙書郎時事。

王閔

王閔者，王莽叔父平阿侯譚子也。王莽篡位，潛忌閔，乃出爲東郡太守。閔懼誅，常繫藥手內。莽敗，漢兵起，

閔獨完全。

王元

王元，杜陵人。〔案〕范書隗囂傳：元字惠孟。





# 東觀漢記卷十五

## 列傳十

丁綝

丁綝字幼春。定陵人也。伉健有武略。從上渡河。拜河南太守。及封功臣。上令各言所樂。謂綝曰。諸將皆欲縣子獨求鄉。何也。〔案〕范書丁鴻傳。諸將皆占豐邑美縣。惟綝願封。綝曰。昔孫叔敖救其子。受封必求磽确之地。今綝能薄功微。得鄉亭厚矣。上從之。封爲定陵新安鄉侯。食五千戶。後徙封陵陽侯。

丁鴻

丁鴻字孝公。〔案〕鴻綝長子。李善文選注。作字季公。年十三。從桓榮受歐陽尙書。三年而明章句。善論難。爲都講。遂篤志精銳。布衣荷擔。不遠千里。父綝從征伐。鴻獨與弟盛居。憐盛幼小而共寒苦。及綝卒。鴻當襲封。上書讓國於盛。書不報。旣葬。乃挂衰經於冢廬而去。留書與盛。曰。鴻貪經書。不顧恩義。弱而隨師。生不供養。死不飯吟。皇天祖禰。並不佑助。身被大病。不任茅土。前上疾狀。願辭爵章。不報。迫於當封。謹自放。鴻初與大江人鮑駿同事。桓榮甚相友善。及鴻亡。駿遇於東海。陽狂不識駿。駿乃止而讓之。曰。今子以兄弟私恩而絕父不滅之基。可謂智乎。鴻感愴垂涕歎息。乃還就國。兼射聲校尉。〔案〕范書本傳。明帝永平十三年。鴻以侍中兼此職。肅宗詔鴻與太常

樓望少府成封屯騎校尉桓郁衛士令賈逵等集議五經同異於白虎觀使五官中郎將魏應主承制問難侍中淳于恭奏上上親稱制臨決上嗟歎鴻才號之曰殿中無雙丁孝公賜錢二十萬〔案〕上嗟歎鴻才以下數句太平御覽作鴻以林論最明儒者稱之數元和二二年車駕東巡狩鴻以少府從上奏曰臣聞古之帝王統治天下五載巡狩至於岱宗柴祭於天望秩山川協時月正日同斗斛權衡使人不爭陛下尊履蒸蒸奉承弘業祀五帝於明堂配以光武二祖四宗咸有告祀瞻望太山嘉澤降澍柴祭之曰白氣上升與燎烟合黃鵠羣翔所謂神人以和答響之休符也上善焉三年以廬江郡爲六安國徙封鴻爲馬亭侯日食鴻爲司徒上疏曰臣聞春秋日食三十六而弑君三十六變不空生夫帝王不宜以重器假人觀古及漢傾危之禍靡不由世位擅寵之家伏見大將軍〔案〕此下有闕文刺史二千石初除謁辭求通待報雖奉璽書受臺敕不敢去至數十日背公室向私門此乃上威損下權盛外附之臣依託權門諂諛以求容媚宜誅之永元四年兼衛尉鴻薨子湛嗣湛卒子浮嗣浮卒子夔嗣

宣秉

宣秉〔案〕范書本傳秉字巨公馮翊雲陽人建武元年拜御史中丞上持詔御史中丞與司隸校尉尙書令會同並專席而坐故京師號曰三獨坐

宣彪

宣彪〔案〕彪官至玄菟太守。

王丹

王丹字仲回京兆人也。資性清白。疾惡豪強。每歲農時。載酒肴。便於田頭大樹下。飲食勸勉之。〔案〕此句作於田間候勤者與而勞之。因留其餘酒肴而去。閭里有喪。憂輒度其資用。教之儉約。因爲其制日定葬。其親喪不過

留殯一月。其下以輕重差焉。時河南太守同郡陳遵。關西之大俠也。其友人喪親。遵爲護喪事。賻助甚厚。

丹乃懷縑一匹。陳之於主人前。曰如丹此縑。出自機杼。遵聞而有慚色。更始時。遵爲大司馬護軍。出使匈奴。

過辭於丹。丹曰。俱遭時反覆。惟我二人爲天地所遺。今子當之絕域。無以相贈。贈子以不拜。遂揖而別。

遵甚悅之。鄧禹平三輔。糧乏。丹上麥二千斛。禹高其節義。表丹領左馮翊。〔案〕范書本傳丹以稱疾不視事免歸。司徒侯霸

欲與丹定交。丹被徵。霸遣子昱候。昱道遇丹。拜於車下。丹答之。昱曰。家君欲與君投分。何以拜子孫耶。丹

曰。君房有是言。王丹未許之。丹子有同門生喪親。家在中山。白丹欲往奔慰。結侶將行。丹怒而撻之。令寄

縑以祠焉。或問其故。丹曰。交道之難。未易言也。初有薦士於丹者。丹選舉之。而後所舉者陷罪。丹坐免。客

慚自絕。俄而丹復徵爲太子太傅。乃呼客見之。謂曰。何量丹之薄。不爲設席。食以罰之。相待如舊。

王良

王良字仲子。東海人。少清高。爲大司徒司直。在位恭儉。妻子不之官舍。布被瓦器。時司徒吏鮑恢以事到

東海過候其家。而良妻布裙徒跣。曳柴從田中歸。恢曰。我司徒吏。故來受書。欲見夫人。妻曰。妾是也。恢乃下拜。歎息而還。良以疾歸。一歲復徵。至滎陽。疾篤。不任進道。乃過其友人。友人不肯見。曰。不有忠言奇謀。而取大位。何其往來屑屑不憚煩也。遂拒之。良慚。自後連徵輒稱疾。

申屠剛

申屠剛字巨卿。扶風人。性剛直中正。志節抗厲。常慕史鮪汲黯之爲人。涉獵書記。果於行義。元始中。舉賢良對策。昔周公豫防禍。首先遣伯禽守封於魯。離斷至親。以義割恩。使己尊寵不加其後。言甚切直。建武初。徵拜侍御史。遷尙書令。審審多直言。無所屈撓。時隴蜀未平。上嘗欲近出。剛諫。上不聽。剛以頭軼乘輿車輪。馬不得前。

邳惲

邳惲字君章。汝南人也。上書諫王莽。令就臣位。莽大怒。卽收繫惲。難卽害。使黃門脅導惲。令爲狂疾恍惚。不自知所言。惲曰。所言皆天文。非狂人所造作。惲與董子張友。子張父及叔父爲鄉里盛氏。一時所害。子張病將終。惲往候之。子張視惲歔歔不能言。曰。吾知子不悲天命長短。而痛二父讎不復也。子張目擊而已。惲卽將各遮讎人。取其頭以示子張。子張見而氣絕。惲見令以狀首。令應之遲。趨出就獄。令跣追之不及。卽自入獄謝之。拔刀自嚮以要惲。曰。子不從我出。敢不以死明心乎。惲遂出。汝南太守歐陽歙召惲爲



功曹汝南舊俗十月饗會百里內皆齋牛酒到府飲譙時臨饗禮畢歛教曰西部督郵繇延天資忠貞不嚴而治今與衆儒共論延功顯之於朝。憚於下座愀然前曰案延資性貪邪外方內員朋黨構姦罔上害民。明府以惡爲善以直從曲此既無君又復無臣。憚敢奉觥歛色慙不知所爲。門下掾鄭敬進曰君明臣直功曹言切明府德也。歛意少解曰實歛罪也。鄭次都隱於弋陽山中。憚卽去從。次都止漁釣甚娛留數十日。憚喟然歎曰天生俊士以爲民也。鳥獸不可與同羣。子從我爲伊尹乎。將爲許巢而去堯舜也。次都曰吾年耄矣安能從子。子勉正性命勿勞神以害生。告別而去。憚客於江夏郡舉孝廉爲郎爲上東門候。光武嘗出夜還詔開門欲入。憚不納。上令從門問識面。憚曰火明燎遠遂拒不開。明日憚上書曰昔文王不敢盤於遊田以萬民爲憂。而陛下遠獵山林以夜繼晝。其如社稷宗廟何。誠小臣所竊憂也。由是上特重之。憚爲長沙太守。坐前守張禁多受遺送千萬。以憚不推劾。故左遷。芒長芒守丞韓龔受大盜丁仲錢。阿擁之。加笞八百不死。入見憚。稱仲健。憚怒以所杖鐵杖捶龔。龔出怨對。遂殺仲。憚故坐免。

### 郭伋

郭伋字細侯河南人也。(案)范書本傳以伋爲扶風茂陵人。與此異。拜潁川太守。召見辭謁。帝勞之曰郡得賢能太守去帝城不遠。河潤九里。冀京師並蒙福也。爲并州牧。前在州素有恩德。老小相攜道路。行部到西河美稷。有童兒數百各騎竹馬於道次迎拜。伋問兒曹何自遠來。對曰聞使君始到喜。故奉迎。伋辭謝之事訖。諸兒送出。

郭外問使君何日當還。使別駕計日告之。既還。先期一日。使謂違信。止於野亭。須期乃入。使知盧芳夙賊難卒。以力制。常嚴烽候。明購賞。以結寇心。

杜詩

杜詩字君公。〔案〕范書本傳。詩河內汲人。建武元年爲侍御史。安集雒陽。時將軍蕭廣放縱兵士。猝暴民間。詩救曉不

改。遂格殺。廣還以狀聞。上召見。賜以棨戟。復使河東。誅降逆賊楊異等。爲南陽太守。性節儉。而治清平。以誅暴立威信。善於計略。省愛民役。造作水排。鑄爲農器。用力省。見功多。時人方於召信臣。故南陽人爲之語。前有召父。後有杜母。坐遣客爲弟報讎。被徵。會病卒。喪無所歸。詔使治喪。郡國邸。賻絹七千匹。

孔奮

孔奮字君魚。右扶風茂陵人。竇融請奮署議曹掾。守姑臧長。奮素孝。供養至謹。時天下擾亂。惟河西獨安。而姑臧稱爲富邑。通貨。故羌市四合。每居縣者。不盈數月。輒致豐積。奮在姑臧四年。財物不增。惟老母極膳。妻子但菜食。或嘲奮曰。直脂膏中。亦不能自潤。而奮不改其操。詔書以奮在姑臧。治有絕迹。賜爵關內侯。爲武都丞。妻時在郡。爲隗囂餘黨所攻。殺太守。得奮妻子。奮追賊。賊推奮之子於軍前。奮年五十。惟有一子。不願。遂擒賊。而其子見屠。帝嘉其忠。遷武都太守。奮篤於骨肉。弟奇在雒陽。爲諸生。分俸祿。以供其糧用。四時送衣。下至脂燭。每有所食甘美。輒分減以遺奇。

張堪

張堪字君游。〔案〕范書本傳。堪南陽宛人。年六歲受業長安。治梁丘易。才美而高。京師號曰聖童。堪守蜀郡。〔案〕范書本傳。不載

堪為蜀守。公孫述遣擊之。堪有同心之士三千人。相謂曰。張君養我曹。為今日也。乃選擇水軍三百人。斬竹為

箆渡水。遂免難。堪與吳漢并力討公孫述。遂破蜀。漢先遣堪入成都。鎮撫吏民。時述珍寶珠玉。委積無數。

堪錄簿上官。秋毫無取。堪去蜀郡。乘折轅車。白布被囊。為漁陽太守。有惠政。開治稻田八千餘頃。教民種

作。百姓以殷富。童謠歌曰。桑無附枝。麥穗兩岐。張君為政。樂不可支。視事八年。匈奴不敢犯塞。光武詔曰。

平陽城李善稱故令范遷於張堪。〔案〕此句疑有脫誤。令人面熱出汗。其賜堪家新繒百匹。以表廉吏。

衛颯

衛颯。〔案〕范書本傳。颯字子產。河南修武人。為桂陽太守。鑿山通路。列亭置驛。視事十年。徵還。颯到即引見。賜食於前。從吏

二人。賜冠幘錢人五千。

茨充

茨充字子河。〔案〕酈道元水經注。作字子何。宛人也。初舉孝廉。之京師。同侶馬死。充到前亭。輒舍車持馬。還相迎。鄉里號

之曰。一馬兩車。茨子河充為桂陽太守。俗不種桑。無蠶織絲麻之利。類皆以麻。泉頭縵著衣。民惰窳。少蠶

履。盛冬皆以火燎。足多剖裂。充令屬縣教民益種桑柘。養蠶桑織履。復令種紵麻。數年之間。人賴其利。衣

履溫煖。元和中，荊州刺史上言：「臣行部入長沙界，觀者皆徒跣。臣問御佐曰：『人無履，亦苦之否？』御佐對曰：『十二月盛寒時，並多剖裂血出，然火燎之，春溫或膿潰。』」建武中，桂陽太守茨充教人種桑蠶，人得其利。至今江南頗知桑蠶織履，皆充之化也。

任延

任延，字長孫，南陽宛人。更始拜爲會稽西部都尉。時年十九，迎吏見其少，皆驚。及到澹泊，無爲下車，遣吏以中牢具祠。延陵季子時天下新定，道路未通，避亂江南者皆未還中土。會稽頗稱多士，延到皆禮之，乃聘請高行俊乂，如董子儀、嚴子陵等，敬待以師友之禮。掾吏貧者，輒分俸祿以賑給之。省諸卒，令耕公田。以周窮急，每時行縣，輒使慰勉孝子，就餐飯之。崇禮養善如此。建武初，延上書言：「臣贊拜不由王庭，願收骸骨，詔書徵延。民攀持車轂涕泣，除睢陽令。每至歲時，伏臘，延輒休遣繫徒，各使歸家，並感其恩德。應期而還，有囚於家被病，自載詣獄，既至而死。延率掾吏殯於門外，百姓悅之。爲武威太守，河西舊少雨澤，延乃爲置水官吏，修理溝渠，皆蒙其利益。」

董宣

董宣，〔案〕范書本傳，宣字少平，陳留圉人。爲洛陽令，擊搏豪彊。在縣五年，年七十四卒。官詔遣使臨視，惟布被覆尸，妻子對哭，家無餘財。上歎曰：「董宣死，乃知貧耳。」



樊曄

樊曄字仲華。〔案〕范書本傳曄南陽新野人。曄與世祖有舊。世祖嘗於新野坐文書事被拘。時曄爲市吏餽餌一筍。上德之。建武初拜爲河東都尉。臨發之官。引見雲臺。賜御食衣被。上調曄曰。一筍餌得都尉何如。曄頓首曰。小臣蒙恩。特見拔擢。陛下不忘往舊。臣得竭死自効。曄爲天水郡。其政嚴猛。好申韓之術。不假下以權。道路不敢相盜。人有犯其禁者。率不生出獄。吏人及羌胡畏之。道不拾遺。行旅至夜。聚衣裝道旁。曰。以付樊公。後還。其物如故。涼州爲之歌曰。寧見乳虎穴。不入冀府赤。大笑期必死。忿怒或見置。嗟我樊府君。安可再遭值。

李章

李章。〔案〕范書本傳。章字第。公河內懷人。爲千乘太守。坐誅斬盜賊過濫。徵下獄免。

馮駿

長沙中尉馮駿。將兵詣岑彭。璽書拜駿爲威虜將軍。

鄧讓

鄧讓夫人。光烈皇后姊也。



# 東觀漢記卷十六

## 列傳十一

班彪

〔案〕范書本傳彪字叔皮扶風安陵人

避地河西大將軍竇融以爲從事深相敬愛接以師友之道

班固

班固〔案〕固彪子

字孟堅年九歲能屬文詞詩賦及長遂博貫載籍九流百家之言無不窮究學無常師不爲

章句舉大義而已性寬和容衆不以才能高人諸儒以此慕之時人有上言班固私改作史記詔下京兆收繫固弟超詣闕上書具陳固不敢妄作但續父所記述漢事徵固詣校書除蘭臺令史遷爲郎典校祕書令卒前所續史記固數入讀書禁中每行巡狩輒獻賦頌

班超

班超字仲升扶風安陵人徐令彪之子也爲人大志不修小節然內孝謹居家常執勤苦不恥勞辱有口辯而涉獵書傳持公羊春秋多所窺覽家貧恒爲官傭寫書以供養久勞苦嘗輟業投筆歎曰大丈夫無他志略猶當效傅介子張騫立功異域以取封侯安能久事筆研間乎超行詣相者曰祭酒布衣諸生爾

而當封侯萬里之外。超問其狀。相者曰：生燕頰虎頭。飛而食肉。此萬里侯相也。永平中。竇固擊匈奴。超爲假司馬。將兵別擊伊吾。戰於蒲類海。多斬首虜。固又遣與從事郭恂俱使西域。鄯善王廣禮敬甚備。後更疎懈。超謂其官屬曰：寧覺廣志意薄乎。此必有匈奴使來也。召侍胡詐之曰：匈奴使來數日。安在。侍胡具服。超悉會其吏士三十六人。酒酣。激怒曰：不探虎穴。不得虎子。當今之計。獨有因夜以火攻虜。使彼不知我多少。必大驚怖。可殄盡。鄯善破膽。功成事立也。衆曰：善。遂將吏士往奔虜營。超手格殺三人。斬得匈奴使屋類。帶副使比離支首及節。明日乃還。告郭恂。恂大驚。旣而色動。超知其意。舉手曰：掾雖不行。班超何心獨擅之乎。恂乃悅。鄯善一國驚怖。竇固具上超功。并求更選使使西域。帝壯超。詔固曰：吏若班超。何故不遣而選乎。今以超爲假司馬。令遂前功。固欲益其兵。超曰：願得本所從三十餘人。足以備有餘。多益爲重累。超至西域。于闐王廣德禮意甚疎。其俗信巫。巫言神怒。何故向漢。漢使有驪馬。急求取以祠我。廣德就超請馬。超許之。而令巫自來取馬。有頃。巫至。超卽斬其首。送廣德。因辭讓之。超曰：臣乘聖漢威神。出萬死之志。冀立鉛刀一割之用。(案)范書本傳：章帝建初三年。超旣服疏勒于闐。欲因此匡平諸國。乃上疏請兵。此其疏中語。前後文闕。建初八年。稱超爲將兵長史。假鼓吹黃麾。超討焉耆。焉耆王廣遣其左將北鞬支奉迎。超賜而遣焉耆國有葦橋之險。廣乃絕橋。不欲令漢軍入國。超更從他道渡。超定西域五十餘國。乃以漢中郡南鄭之西鄉戶千封超爲定遠侯。超自以久在絕域。年老思土。上疏曰：臣常恐年衰。奄忽僵仆。不敢望到酒泉郡。但願生入玉門關。安息遣使

獻大爵師子。超遣子勇隨入塞。超爲都護。以任尙代超。尙謂超曰：君在外國三十餘年，而小人猥承君後，宜有以誨之。超曰：塞外吏士，本非孝子順孫，皆以罪過徙補邊，而蠻夷懷鳥獸之心，難禁易敗。今君性嚴急，水清無大魚，察政不得下和，宜陽爲簡，而寬小過，總大綱而已。超在西域三十一歲，還洛陽，拜射聲校尉。

### 班始

班始〔案〕始超長子雄子尙陰城公主名賢得〔案〕賢得司馬彪五行志作堅得

### 鄭興

鄭興〔案〕范書本傳興字少贇河南開封人從博士金子嚴爲左氏春秋。

### 鄭衆

鄭衆字仲師〔案〕衆興子建武中，太子及山陽王因虎賁中郎將梁松請衆欲爲通籍，遺練帛，衆悉不受。謂松曰：太子儲君，無外交義，漢有舊防，諸王不宜通客。松風以長者難逆，不可不慮。衆曰：犯禁觸罪，不如守正而死。廬江獻鼎，有詔召衆問齊桓公之鼎在柏寢臺，見何書。春秋左氏有鼎事，衆對狀。除郎中。永平中，北匈奴遣使求和親，上遣衆持節使匈奴。衆素剛烈，至北庭，虜欲令拜，衆不爲屈。單于大怒，圍守閉之，不與水火。欲脅服衆，衆拔刀自誓，單于恐而止。復遣衆使北匈奴，衆因上書言，臣前奉使，不爲匈奴拜，單于

恚怒放兵圍臣。今臣銜命，必見陵折。臣恐不忍，將大漢節，對氈裘獨拜。如令匈奴遂能服臣，將有損大漢之強。上不聽，衆不得已。既行，後果爲匈奴所殺。（案）范書本傳：衆在路連上書，詔追還繫廷尉。會赦歸家，後爲軍司馬，仕至大司農。此文疑誤。

范升

范升（案）范書本傳升遷博士，每有大議，輒見訪問。

陳元

陳元（歸）范書本傳元字長孫，著梧廣信人。上疏曰：扶瑕摘釁，掩其弘美。（案）范書本傳：元習左氏春秋，建武初，議立左氏

後文光武興立左氏，而桓譚衛宏並共毀訾，故中道而廢。

桓榮

桓榮字春卿，沛國人也。本齊桓公後，桓公作伯支庶，用其諡，立族命氏焉。榮少勤學，講論不怠。治歐陽尚書，事九江朱文剛，窮極師道，貧窶無資，常客傭以自給，精力不倦。十五年不窺家，拜議郎，授皇太子經。每朝會，輒令榮於公卿前敷奏經書，帝稱善，曰：得卿幾晚。歐陽尚書博士缺，上欲用榮，榮叩頭讓曰：臣經術淺薄，不如同門生郎中彭閔揚州從事臯弘。帝曰：命往汝諧。因拜榮爲博士，引閔爲議郎。（案）范書本傳：引閔弘俱爲議郎，與此稍異。車駕幸太學，會諸博士論難於前，榮被服儒衣，溫恭有蘊藉，明經義，每以禮讓相厭，不以辭長勝人。儒者莫之及，特爲加賞賜，又詔諸生雅吹擊磬，盡日乃罷。後入會庭中，詔賜奇果，受者懷之。榮獨舉手

奉以拜。帝笑指之曰：「此真儒生也。」愈見敬厚。榮嘗寢病，太子朝夕遣中人問疾，賜以帷帳、奴婢。曰：「如有不諱，無憂家室也。」後病愈，入復侍講。太子報榮書曰：「君慎疾加餐，重愛玉體。」（案）范書本傳：榮以太子經學成畢，上疏歸道，故太子報書。建武二十八年，以榮爲少傅，賜以輜車乘馬。榮大會諸生，陳車馬印綬，曰：「今日所蒙稽古之力也，可不勉乎？」初，榮遭倉卒困厄時，嘗與族人桓元卿俱拮拾，投間輒誦詩。元卿謂榮曰：「卿但盡氣爾，當安復施用時乎？」榮笑而不應。後榮爲太常，元卿來候榮，榮諸弟子謂曰：「平生笑君盡氣，今何如？」元卿曰：「我農民，安能預知如此？」顯宗卽位，尊榮以師禮，嘗幸太常府，令榮坐東面，設几杖，會百官驃騎將軍東平王蒼以下榮門生數百人。天子親自執業，時執經生避位發難，上輒謙曰：「太師在是，旣罷，悉以太官供具賜太常家，其恩禮如此。」永平二年，辟雍成，拜榮爲五更，每大射養老禮畢，上輒引榮及弟子升堂執經，自爲辯說。詔曰：「五更沛國桓榮，以尙書授朕，十有餘年，詩云：『日就月將，示我顯德行。』其賜爵關內侯，食邑五百戶。後以五更祿終厥身。子郁以明經復爲太常。」

### 桓郁

桓榮卒，子郁當襲爵，讓於兄子。（案）范書本傳：郁字仲思，郁兄子名汎。顯宗不許，不得已受封，而悉以租入與之。上以郁先師子有禮讓，甚見親厚。郁以永平十四年爲議郎，遷侍中，上自制五家要說章句，令郁校定於宣明殿。上謂郁曰：「卿經及先師致復文雅，其冬上親於辟雍自講所制五行章句已，復令郁說一篇。」上謂郁曰：「我爲

孔子卿爲子夏起予者商也。又問郁曰：子幾人能傳學？郁曰：臣子皆未能傳學。孤兄子一人學方起。上曰：努力教之。有起者卽白之。皇太子賜郁鞍馬刀劍。郁乃上疏。皇太子曰：伏見太子體性自然，包含今古，謙謙允恭，天下共見。郁父子受恩無以明，益夙夜慙懼，誠思自竭，愚以爲太子上當合聖心，下當卓絕於衆。宜思遠慮以光朝廷。永元二年，西謁園陵，郁兼羽林中郎將，上賜馬二匹，并鞍勒防汗。

桓焉

桓焉〔案〕焉，郁第三子。范書本傳焉字叔元。爲太子太傅，以母憂自乞，聽以大夫行喪。踰年，詔使賜牛酒，奪服，卽拜光祿大夫，遷太常。

桓鸞

桓鸞〔案〕鸞，焉弟。良子。范書本傳鸞字始春。父良，龍舒侯相。鸞貞亮之性，著乎幼沖，學覽六經，莫不貫綜，推財孤寡，分賄友朋。泰於待賢，狹於養己，常著大布縕袍，糲食麤餐，除陳留已吾長，旬月間，遷河內汲令。

桓典

桓典字公雅〔案〕典，焉仲子。順子。舉孝廉，爲郎中，居無幾，相王吉以罪被誅，故人親戚莫敢至者，典獨棄官收斂歸葬。服喪三年，爲立祠堂，盡禮而去。爲御史，是時宦者執政，典無迴避，常乘驄馬，京師畏憚，爲之語曰：行行且止，避驄馬御史。



桓礪

桓礪(案)礪鬻子范書本傳作曄一名嚴字文林。尤修志介。一餐不受于人。不應辟命。初平中。天下亂。礪到吳郡。刺史劉孫

振給穀食衣服所乏者。悉不受。後東適會稽。住止山陰縣故魯相鍾離意舍。太守王朗餉給糧食布帛牛羊。一無所留。臨去之際。屋中尺寸之物。悉疏付主人。纖微不漏。移居揚州。從屈豫室中。中庭橘樹一株。遇實熟。乃以竹藩樹四面。風吹落雨實。以繩繫著樹枝。每當危亡之急。其志彌固。賓客從者。皆肅其行也。

張佚

建武二十八年。大會百官。詔問誰可傅太子者。羣臣承意。皆言太子舅執金吾陰識可。博士張佚正色曰。今陛下立太子。爲陰氏乎。爲天下乎。卽爲陰氏。則陰侯可。爲天下。則固宜用天下之賢才。上稱善。曰欲置傅者。以輔太子。今博士不難正朕。況太子乎。卽拜爲太子太傅。

桓譚

桓譚。字君山。沛人。少好學。徧治五經。能文。有絕才。而喜非毀俗儒。由是多見排詆。哀平間。位不過郎。光武卽位。拜議郎。譚上書曰。富商大賈。多收田貨。中家子爲之保役。受計上疏。趨走俯伏。譬若臣僕。坐而分利。又賈人多通侈靡之物。羅紈綺繡。雜綵玩好。以淫人耳目。而竭盡其財。是爲下樹奢媒。而置貧本也。求人。之儉約富足。何可得乎。夫俗難卒變。而人不可暴化。宜抑其路。使之稍自衰焉。矯稱孔子爲讖記。以誤人。

主。〔案〕范書本傳時帝方信譚譚上疏爭之譚譏訕圖讖有詔會議靈臺所處上謂譚曰吾欲以讖決之此二句即疏中指斥讖記語前後文闕何如譚默然良久對曰臣生不讀讖上問其故譚復極言讖之非經上大怒曰桓譚非聖無法將下斬之譚叩頭流血良久乃得解由是失旨遂不復轉遷出爲六安郡丞之官意忽忽不樂道病卒時年七十餘譚著書言當世行事號曰新論光武讀之敕言卷大令皆別爲上下凡二十九篇惟琴道未畢但有發首一章章帝元和中行巡狩至沛令使者祠譚冢鄉里甚榮之

劉昆

劉昆字桓公。〔案〕范書本傳昆陳留東昏人少治施氏易篤志經學教授弟子常五百餘人每春秋享射常備列典儀以素木列瓠葉爲俎豆爲光祿勳授皇太子及諸王小侯五十人經昆老退位以二千石祿終其身

劉軼

劉軼字君文。〔案〕軼昆子永平中以中庶子入侍講

注丹

注丹字子玉。〔案〕范書本傳丹南陽育陽人世傳孟氏易作通論七篇世重之號注君通論

戴憑

戴憑字次仲。〔案〕范書本傳憑汝南平輿人爲侍中數進見問得失上謂憑曰侍中當匡輔國政勿有隱情憑對曰陛下

嚴曰朕何用嚴。憑曰：伏見前太尉西曹掾蔣遵，清亮忠孝，學通古今，陛下納膚受之愬，遂至禁錮。世以是爲嚴。上怒曰：汝南子欲復黨乎？憑出，自繫廷尉。詔引見，憑謝曰：臣無奢諤之節，而有狂瞽之言，不能以尸伏諫，偷生苟活，誠慙聖朝。上卽敕尙書解遵禁錮，拜憑虎賁中郎將，以侍中兼領之。正旦朝賀，百僚畢會，上令羣臣能說經者更相難詰，義有不通，輒奪其席，以益通者。憑遂重坐五十餘席。故京師爲之語曰：解經不窮戴侍中。

牟長

牟長字君高。(案)范書本傳：長樂安臨濟人。少篤學，治歐陽尙書，諸生著錄前後萬人。建武十四年，徵爲中散大夫，拜少府。詔曰：少府大儒，不失法度，其見優如此。

尹敏

尹敏字幼季。(案)范書本傳：敏南陽堵陽人。拜郎中，辟大司空府。上以敏博通經記，令校圖讖。敏對曰：讖書非聖人所作，其中多近鄙別字，頗類世俗之辭，恐疑誤後生。遷長陵令。永平五年，詔書捕男子周慮，慮素有名字與敏善，過候敏坐繫，免官。出乃歎曰：瘖聾之徒，眞世之有道者也。何謂察察而遇斯禍也？敏與班彪親善，每相遇與談，常日旰忘食。晝卽至暝，夜則達旦。彪曰：相與久語，爲俗人所怪。然鍾子期死，伯牙破琴，曷爲陶陶哉。

高詡

高詡字季回。〔案〕范書本傳詡平原般人。以儒學徵拜大司農。在朝以清白方正稱。

丁恭

上封功臣皆爲列侯。大國四縣。縣各有差。博士丁恭等。〔案〕范書本傳恭字子然。山陽東緡人。議曰。古帝王封諸侯。不過百里。故利以建侯。取法於雷。強幹弱枝。所以爲治也。今封諸侯四縣。不合法制。上曰。古之亡國。皆以無道。未嘗聞功臣地多而滅亡者。乃遣謁者卽授印綬。

甄宇

甄宇字長文。北海人。治嚴氏春秋。持學精微。以白衣教授。常數百人。建武中。爲青州從事。徵拜博士。每臘。詔賜博士羊人一頭。羊有大小肥瘦。時博士祭酒議欲殺羊。稱分其肉。宇曰。不可。又欲投鉤。宇復恥之。宇因先自取其最瘦者。由是不復有爭訟。後召會詔問瘦羊甄博士。京師因以稱之。拜太子少傅。清淨少欲。常稱老氏知足之分也。宇傳子晉。晉傳子承。周澤董魯平。叔叔子軼。並以儒學拜議郎也。

張玄

張玄字君夏。〔案〕范書本傳玄河內河陽人。欲專意經書。方其講問。乃不食終日。忽然如不飢渴。爲博士。其學兼通數家。

李躬

三老常山李躬。年耆學明。以二千石祿養終身。〔案〕此明帝永平二年詔文。躬范書無傳。

### 蘇竟

蘇竟。〔案〕范書本傳。竟字伯況。扶風平陵人。與劉歆兄子恭書曰。前世以磨研編簡之才。與國右史公從事出入者。惟硯也。〔案〕范書本傳。作走昔。以磨研編削之才。與國師公從事出入。蓋歆於莽時爲國師。此文國右史公。卽國師公之誤。末者惟硯也四字。當是後人妄增。

### 丁邯

丁邯。〔案〕邯。范書不載。司馬書。劉昭注。引趙岐三輔決錄注云。邯字叔春。京兆陽陵人。高節正直不撓。舉爲孝廉。

### 溫序

溫序。字次房。〔案〕范書本傳。序。太原祁人。爲護羌校尉。行部爲隗囂別將苟宇所拘劫。宇謂序曰。子若與我并威同力。天下可圖也。序素有氣力。大怒。叱宇等曰。虜何敢迫脅漢將。因以節撻殺數人。賊衆爭欲殺之。宇止曰。此義士也。可賜以劍。序受劍銜鬚於口。顧左右曰。旣爲賊所迫殺。無令鬚汚土。遂伏劍而死。

### 周嘉

周嘉。〔案〕范書本傳。嘉字惠文。汝南安城人。仕郡爲主簿。王莽末。羣賊入汝陽城。嘉從太守何敞討賊。敞爲流矢所中。賊圍繞數十重。嘉乃擁斂以身扞之。呵賊曰。卿曹皆人隸也。爲賊旣逆。豈有還害其君者耶。嘉請以死贖君命。因仰天號泣。羣賊於是相視曰。此義士也。給車馬遣送之。爲零陵太守。視事七年卒。零陵頌其遺愛。吏民

爲立祠焉。

劉茂

劉茂字子衛。

〔案〕范書本傳茂太原晉陽人。

爲郡門下掾。赤眉攻太原。茂負太守孫福踰牆出。藏城西門下空穴中。擔穀

給福及妻子百餘日。福表爲議郎。

索盧放

索盧放字君陽。東郡人。署門下掾。更始時。使者督行郡國。太守有事當斬。放前對曰。今天下苦王氏之虐政。戴仰漢德。傳車所過。未聞恩澤。而斬郡守。恐天下惶懼。各自疑也。使有功不如使有過。遂解衣而前。願代太守斬。使者義而赦之。由是顯名。

朱勃

朱勃字叔陽。扶風平陵人。年十二。能誦詩書。嘗候馬。援兄況。勃衣方領。能矩步。辭言爛雅。援裁知書。見之自失。兄知其意。乃自酌酒慰援曰。朱勃小器速成。智盡此耳。卒當從汝。稟學勿畏。勃未二十。右扶風請試守渭城宰。及援爲將軍封侯。而勃位不過縣令。援後貴。常待以舊恩。而卑侮之。勃卒自親。及援遇讒。惟勃能終焉。勃上書理援曰。車駕討隗囂。豪彊略城。會長殺吏。惟獨狄道爲國堅守。士民饑饉。煮履啖弩。寄命漏刻。援謀如涌泉。勢如轉規。救倒懸之急。存幾亡之城。飛鳥時衝。馬驚觸虎。物類相生。亦無不有。章帝下

詔曰。告平陵令丞縣人。故雲陽令朱勃。建武中。以伏波將軍爵土不傳。上書陳狀。不顧罪戾。懷旌善之志。有烈士之風。詩云。無言不讎。無德不報。其以縣見穀二千石。賜勃子若孫。勿令遠詣闕謝。

### 樊顯

上嘗召見諸郡計吏。問其風土及前後守令能否。蜀郡計掾樊顯進曰。漁陽太守張堪。昔在蜀。其仁以惠下。威能討姦。前公孫述破時。珍寶山積。捲握之物。足富十世。而堪去職之日。乘折轅車。布被囊而已。上聞歎息。以顯陳堪行有效。卽除漁陽令。〔案〕范書張堪傳作拜顯爲魚復長。

### 楊正

楊正爲京兆功曹。光武崩。京兆尹出。西域賈胡共起帷帳設祭。尹車過帳。賈牽車令拜。尹疑止車。正在前導。曰。禮天子不食支庶。況夷乎。敕壞祭乃去。

### 崔篆

崔篆。涿郡安平人。王莽時爲郡文學。以明經徵詣公車。太保甄豐舉爲步兵校尉。篆辭曰。吾聞伐國不問仁人。戰陣不訪儒士。此舉奚至哉。遂投劾歸。爲建新大尹。篆歎曰。吾生值澆弊之君。上有老母。下有兄弟。安得獨潔己而危所生哉。乃單車到官。稱疾三年。不視事。行縣門下。掾倪敞諫篆。乃強起班春。所至之縣。獄犴填滿。篆垂涕曰。嗟乎。刑罰不中。乃陷民於寃。此皆何罪而至於此乎。遂平理。所出二千餘人。掾吏叩

頭諫曰。誠仁者之心。然獨爲君子。將有悔乎。篆曰。邾文公不以一人易其身。君子謂之知命。如殺一大尹。贖二千人。蓋所願也。遂稱疾去。

崔駟

竇憲爲車騎將軍。辟崔駟爲掾。(案)駟。篆孫。范書本傳。駟字亭伯。憲府貴重。掾屬三十人。皆故刺史二千石。惟駟以處士。年少擢在其間。憲擅權驕恣。駟數諫之。及出征匈奴。道路愈多不法。駟爲主簿。前後奏記數十。指切長短。憲不能容。稍疎之。因察駟高第。出爲長岑長。駟自以遠去不得意。遂不之官而歸卒於家。

崔瑗

崔瑗。(案)瑗。駟子。范書本傳。瑗字子玉。愛士好賓客。盛修殺饌。殫極滋味。不問餘產。

崔寔

崔寔。(案)寔。瑗子。范書本傳。寔字子真。爲五原太守。五原土宜麻桑。而民不知紡績。民冬月無衣。積細草而臥其中。見吏則衣草而出。寔至官。勸種麻。命工伐木作機紡車。教民紡績。

倪萌

倪萌。字子明。齊國臨淄人。仁孝敦篤。不好榮貴。常勤身田農。遭歲倉卒。兵革並起。人民餒餓相啖。與兄俱出城採蔬。爲赤眉賊所得。欲殺啖之。詣賊叩頭。言兄年老羸瘠。不如萌肥健。願代兄。賊義而不啖。命歸求



豆來贖兄。萌歸不能得豆。復自縛詣賊。賊遂放之。

古初

長沙有義士古初。遭父喪。未葬。鄰人火起。及初舍。棺不可移。初冒火伏棺上。會火滅。以爲孝感所致云。

王琳

汝南王琳。字巨尉。十餘歲。喪親。遭大亂。百姓奔逃。惟琳兄弟獨守家廬。弟季出遇赤眉賊。將爲餽。琳自縛請先季死。賊矜而放。

蔡順

蔡順。字君仲。汝南人。至孝。王莽亂。人相食。順取桑椹。赤黑異器。賊問所以。云黑與母。赤自食。賊異之。遺鹽二斗。受而不食。

李業

公孫述欲徵李業。〔案〕范書本傳。業字巨游。廣漢梓潼人。業固不起。乃遣人持燭。不起。便賜藥。業乃飲燭而死。

逢萌

逢萌。字子慶。北海人。少有大節。志意抗厲。家貧。給事爲縣亭長。尉過。迎拜問事。微久。尉去。舉拳搗地。歎曰。大丈夫安能爲人役耶。遂去學問。王莽居攝。子宇諫莽。而莽殺之。萌謂其友人曰。三綱絕矣。不去。禍將及。

人解冠挂東都城門歸。將家浮海。客於遼東。萌素明陰陽。知莽將敗。乃首戴蠶器。哭於市曰。辛乎辛乎。遂潛藏不見。隱琅邪之勞山。非禮不動。聚落化之。北海太守遣使奉謁。萌不答。太守遣吏捕之。民相率以石擗吏。皆流血奔走。萌被徵上道。迷不知東西。云朝所徵我者。爲聰明睿智。有益於政。方面不知。安能濟政。卽駕而歸。

王霸

王霸〔案〕范書本傳。霸字孺仲。太原廣武人。建武初。連徵不至。安貧賤。居茅屋蓬戶。藜藿不厭。然樂道不怠。以壽終。

嚴光

嚴光字子陵。〔案〕范書本傳。光一名遵。會稽餘姚人。耕於富春山。後人名其釣處爲嚴陵瀨。

閔貢

閔貢字仲叔。太原人也。恬靜養神。弗役於物。與周黨相友。黨每過貢。共啜菽飲水。無菜茹。黨嘗遺貢生麻。貢歎曰。我欲省煩耳。受而不食。司徒侯霸辟貢。到與相見。勞問之下。不及政事。貢曰。被明公辟。且喜且懼。及奉見明公。喜懼皆去。所望明公問屬。何以爲政。美俗成化。以貢爲不足耶。不當辟也。如以爲任用。而不使臣之。則爲失人。是以喜懼皆去。便辭而出。客居安邑。老病家貧。不能得錢買肉。日買一片豬肝。屠或不肯爲斷。安邑令候之。問諸子何飯食。對曰。但食豬肝。屠者或不肯與。令出敕市吏。後買輒得。貢怪問其子。

道狀如此。乃歎曰。閔仲叔豈以口腹累安邑耶。遂去之沛。

### 周黨

周黨字伯況。太原人。鄉佐發黨徭道。於人中辱之。黨學春秋長安。聞復讎之義。輒講下辭歸。到與鄉佐相聞。期鬪。日鄉佐多從兵。往使鄉佐先拔刀。然後與相擊。鄉佐服其義勇。建武中徵黨著短布單衣。殺皮。轆頭待見。尙書欲令更服。黨曰。朝廷本以是故徵之。安可復更。遂以見。自陳願守所志。上聽之。博士范升奏曰。伏見太原周黨。東海王良。山陽王成。使者三到。乃肯就車。脫衣解履。升於華轂。陛見帝廷。偃蹇傲慢。遂巡進退。臣願與並論雲臺之下。

### 井丹

井丹字大春。〔案〕范書本傳。丹扶風郿人。通五經。時人爲之語曰。五經紛綸井大春。

### 耿嵩

耿嵩字文都。鉅鹿人。履清高之節。齷童介然特立。不隨於俗。鄉黨大人莫不敬異之。王莽敗。賊盜起。宗族在兵中。穀食貴。人民相食。宗家數百人。升合分糧。時嵩年十二三。宗人少長咸共推之。主稟給。莫不稱平。



# 東觀漢記卷十七

## 列傳十二

虞延

虞延字子大。陳留人。爲郡功曹。世祖聞而奇之。建武二十年。東巡。路過小黃。高帝母昭靈后園陵在焉。時延爲郡督郵。詔呼引見。問園陵之事。延進止從容。瞻拜可觀。其園陵樹槩。皆諳其數。俎豆犧牲。頗曉其禮。帝善之。敕延從駕到魯。還經封丘城門下。小不容羽蓋。上怒。使撻侍御史。延因下見引咎。以爲罪在督郵。上詔曰。以陳留督郵虞延故。貸御史罪。賜延錢及帶劍佩刀。還郡。永平初。守新野功曹。鄧寅案范書本傳作鄧衍。以外戚小侯。每預朝會。而容止趨步。有出于衆。上目之。顧左右曰。朕之儀貌。豈若此人。特賜輿馬衣服。延以寅雖有容儀。而無實行。未嘗加禮。上乃詔令自稱南陽功曹。詣闕拜郎中。遷玄武司馬。寅在職不服。父喪。帝聞乃嘆曰。知人則哲。惟帝難之。信哉斯言。寅聞慙而退。

郭丹

郭丹字少卿。南陽人。累世千石。父稚爲丹買田宅居業。丹從師長安。從宛人陳洸買符入函谷關。旣入關。封符乞人。乃慨然而歎曰。丹不乘使者車。不出此關。旣至京師。常爲都講。更始二年。三公舉丹賢能。徵爲

諫議大夫持節使歸南陽。安集受降。自去家十二年。果乘高車出關。如其志焉。更始敗。諸將軍悉歸。上普賜封爵。丹無所歸。節傳以敝布纏裹節。晝伏夜行。求謁更始妻子。奉還節傳。因歸鄉里。爲郡功曹。薦陰宣。程胡魯歆。自代。太守杜詩曰。古者卿士讓位。今功曹稽古含經。可謂至德。編署黃堂。以爲後法。丹師事公孫昌。敬重常待。重編席顯異之。爲司徒。在朝名清廉公正。永平五年薨。詔問丹家。時宗正劉匡對曰。郭丹爲三公。典牧州郡。田畝不增。

周澤

周澤字穉都。北海安丘人。少修高節。耿介特立。好學問。治嚴氏春秋。門徒數百人。隱居山野。不汲汲于時俗。建武十六年。辟大司馬府。署議曹祭酒。爲覬池令。奉公克己。妻子自親釜竈。拜太常。果敢直言。數有據爭。朝廷嘉其清廉。北地太守廖信貪污下獄。詔以信田宅奴婢錢財。賜廉吏太常周澤。

牟融

牟融字子優。(案)范書本傳。融北海安丘人。遷大司農。性明達。居職修治。又善論議。朝廷稱爲名卿。帝數嗟嘆。以爲才堪宰相。

孫堪

孫堪(案)范書本傳。堪字子堪。可。有侯氏人。爲光祿勳。以清廉見稱。與周澤相類。

魏應

魏應字君伯，任城人。拜五官中郎將。諸儒于白虎觀講論五經同異，使應專掌難問。

劉般

劉般字伯興，彭城人。代名忠孝，兼屯騎校尉。〔案〕范書本傳：永平十年徵般行執金吾事，明年兼此職。時五校尉官顯職閒，府寺寬敞。

輿服光麗，伎巧畢給，故多以宗室肺腑居之。爲太僕，在朝竭忠盡節。建初元年，拜爲宗正，憂勤國事，夙夜不怠，數納嘉謀。

劉愷

劉愷字伯豫。〔案〕愷般長子。以當襲父般爵，封居巢侯，讓與其弟憲，遁逃避封久之。章和中有司奏請絕國，上美

其義，特優嘉之。愷猶不出，有司復奏之。侍中賈逵上書曰：孔子稱能以禮讓爲國，於從政乎何有？和帝納之，下詔曰：故居巢侯劉般嗣子愷，當襲父般爵，而稱父遺意，致國弟憲，遜亡七年，所守彌固，蓋王法崇善成人之美，其聽憲嗣爵，乃徵愷拜爲郎，稍遷侍中。愷之入朝，在位者莫不仰其風行。

郭賀

郭賀字喬卿，洛陽人。爲荊州刺史，百姓歌之曰：厥德文明，治有殊政。顯宗巡狩，賜以三公之服，蔽冕之旒。

吳良

吳良字大儀。齊國人。習大夏侯尚書。爲郡議曹掾。歲旦。與掾吏入賀。門下掾王望言曰。齊郡敗亂。遭離盜賊。人民饑餓。不聞雞鳴犬吠之音。明府視事五年。土地開闢。盜賊滅息。五穀豐熟。家給人足。今日歲首。請上雅壽。掾吏皆稱萬歲。良時跪曰。門下掾諂佞。明府勿受其觴。盜賊未盡。人庶困乏。不能家給人足。今良曹掾尙無袴。寧爲家給人足耶。望曰。議曹情竄。自無袴。寧足爲不家給人足耶。太守斂容而止曰。此生言是。遂不舉觴。賜良鰓魚百枚。轉良爲功曹。良恥以言受進。終不肯謁。東平王蒼辟爲西曹掾。數諫蒼。多善策。蒼上表薦良。上以章示公卿曰。前見良頭鬚皎然。衣冠甚偉。求賢助國。宰相之職。蕭何舉韓信。設壇卽拜。不復考試。今以良爲議郎。遷司徒長史。以清白方正稱。

劉平

劉平字公子。楚郡人。〔案〕范書本傳。平本名曠。顯宗後改爲平。以仁孝著聞。更始時。天下亂。平弟仲爲賊所殺。其後賊忽然而至。平扶持其母。奔走逃難。抱仲遺腹女而棄其子。母欲還取之。平不聽。曰。力不能兩活。仲不可以絕類。遂去不顧。與母俱匿野澤中。平朝出求食。爲餓賊所得。將烹之。叩頭曰。今日爲老母求菜。老母饑少氣。待歸爲命。願得歸飯。母畢。還就死。因涕泣。賊哀而遣之。平還食母訖。因白曰。屬與賊期。義不可負。遂還詣賊。衆皆大驚。相謂曰。嘗聞烈士。今乃見之。去矣。吾不忍食子。於是得全。平旣免。乃撫莢得三升豆。以謝賊恩。永平三年爲宗正。數薦達名士承宮。郇恁等。



承宮

承宮(案)范書本傳宮字少子琅邪姑幕人。少孤。年八歲。爲人牧豬。鄉里徐子盛明春秋經。授諸生數百人。宮過其廬。下見諸生講誦。好之。因忘其豬。而聽經。豬主怪其不還。行求索。見生欲笞之。門下生共禁乃止。因留精舍。門下樵薪執苦。數十年間。遂通其經。遭王莽篡位。天下擾攘。盜賊并起。遂避世漢中。建武四年。將妻子之華陰山谷耕種。禾黍臨熟。人就認之。宮悉推與而去。由是顯名。永平中。徵爲博士。遷左中郎將。數納忠諫。論議切直。名播匈奴。時單于遣使求欲得見宮。詔敕宮自整飭。對曰。彼徒炫名。非實識也。臣狀醜。不可以示遠。宜選長大威容者。帝乃以大鴻臚魏應代之。

鍾離意

鍾離意(案)范書本傳意字子阿。會稽山陰人。辟大司徒侯霸府。詔部送徒詣河內。時冬寒。徒病不能行。路過弘農。意輒移屬縣。使作徒衣。縣不得已與之。而上書言狀。意亦具以聞。上得奏。以見霸曰。君所使掾。何乃仁于用心。誠良吏也。意在堂邑爲政。愛利輕刑。慎罰。撫循百姓如赤子。初到縣。市無屋。意出奉錢。帥人作屋。人齎茅竹。或持材木。爭赴趨作。決日而成。功作既畢。爲解土祝曰。(案)解土。太平御覽作民上。興功役者。令百姓無事。如有禍祟。令自當之。人皆大悅。顯宗時。意爲尙書。交趾太守坐贓千金。徵還伏法。詔以其貨物班賜羣臣。意得珠璣。悉以委地而不拜賜。上怪問其故。對曰。臣聞孔子忍渴於盜泉之水。曾參迴車于勝母之間。惡其名也。此

賊穢之物。誠不敢拜受。上嗟歎曰。清乎尚書之言。乃更以庫錢三十萬賜之。詔賜降人縑。尚書案事誤以十爲百。上見司農上簿大怒。召郎將答之。意因叩頭曰。過誤之失。常人所容。若以懈慢爲愆。則臣位大罪重。郎位小罪輕。咎皆在臣。臣當先答。乃解衣就格。上意乃解。上欲起北宮。意上書諫。出爲魯相。後起德陽殿。殿成。百官大會。上謂公卿曰。鍾離尚書若在。不得成此殿。

宋均

宋均字叔庠。〔案〕范書本傳均南陽安衆人。爲九江太守。有兩山。名曰唐后山。有神祠。衆至共爲嫁娶。皆取百姓男女。不復要娶巫家女。百姓患之。長吏莫敢改之。均乃移書曰。自今已去。當爲山娶巫家女。其後乃絕。建武中山陽楚郡多蝗。蜚南到九江。輒東西別去。由是名稱。永平七年。徵爲尚書令。忠正直言。數納策謀。每駁議。未嘗不合上意。

朱酺

朱酺。〔案〕范書荏都夷傳。酺作輔。梁國寧陵人。明帝時。爲益州刺史。移書屬郡。喻以聖德。白狼王等百餘國重譯來庭。歌詩三章。酺獻上。

鮐陽鴻

鮐陽鴻字孟孫。中山人。爲世名儒。永平中。拜少府。

楊政

楊政字子行京兆人治梁丘易與京兆祁聖元同好俱名善說經書京師號曰說經鏗鏗楊子行論難備  
備祁聖元政師事博士范升建武中升爲太常丞爲去妻所誣告坐事繫獄當伏重罪政以車駕出時伏  
道邊抱升子持車叩頭武騎虎賁恐驚馬引弓射之不去旄頭以戟叉政傷胸前政涕泣求哀上卽尺一  
出升政嘗過揚虛侯馬武武稱疾見政對几據牀欲令政拜牀下政入戶前排武徑上牀坐武帳言語不  
擇因把臂責之曰卿蒙國恩備位藩臣不思求賢報國而驕天下英俊今日搖動者刀入脅左右大驚以  
爲見劫操兵滿側政顏色自若會信陽侯至責數武令爲朋友其果勇敢折皆此類也

薛漢

薛漢字子公〔案〕范書本傳作字公子淮陽人才高名遠兼通書傳無不照覽道術尤精教授常數百弟子自遠方至  
者著爲錄

郇恁

郇恁字君大鴈門人也〔案〕郇恁范書周變黃憲傳序及文選李善注並作荀恁隱居教授東平憲王蒼爲驃騎開東閣延賢士辟恁  
署爲祭酒敬禮焉後朝會明帝戲之曰先帝徵君不來驃騎辟君而來何也恁曰先君秉德以惠下臣可  
以禮進退驃騎執法御臣臣懼法而至〔案〕此四句文選李善注作先帝秉德惠下臣故不來驃騎將軍執法檢下臣故不敢不來月餘遂去官

徐匡

永平中車駕出信陽侯陰就干突車騎鹵簿車府令齊國徐匡鉤就車收御者送獄詔書譴匡匡自繫獄吳良上言信陽侯驕慢干突車騎大不敬無人臣禮匡執法守正而下獄恐政化由是而墜詔出匡左遷即丘長〔案〕范書吳良傳帝雖赦匡猶左轉良爲即丘長則左遷者吳良非匡也此文疑誤

張重

張重日南計吏形容短小明帝問云何郡小吏對曰臣日南計吏非小吏也

姜詩

姜詩字士遊廣漢雒人也適值年荒與婦傭作養母詩性至孝母好飲江水令兒常取水溺死夫婦痛恐母知詐曰行學歲歲作衣投於江中俄而涌泉出舍側味如江水日生鯉一雙賊經詩里不敢驚孝子〔案〕太平御覽作赤眉賊經其里落東兵安步云不可驚孝子致米肉詩埋之後吏譴詩詩掘示之

趙孝

趙孝字長平沛國蘄人父爲田禾將軍孝爲郎歸告每往來常白衣步擔嘗從長安來過直上郵亭但稱書生寄止於亭門塾亭長難之告有貴客過灑掃不欲穢污地良久乃聽止吏因問曰田禾將軍子從長安來何時發幾日至孝曰尋到矣時天下亂人相食弟禮爲賊所得孝聞即自縛詣賊曰禮久餓羸瘦不

如孝肥。賊并放之。建武初。天下新定。穀食尙少。孝得穀。炊將熟。令弟禮。夫妻俱出外。孝夫妻共蔬食。比禮夫妻歸。卽曰。我已食訖。以穀飯獨與之。積久。禮心怪疑。後掩伺見之。亦不肯食。遂共蔬食。兄弟怡怡。(案) 南禮北堂書鈔作孝得穀。炊將熟。時弟他出。至暮始回。相待之。同飯。雖蔬食。茹菜。兄弟怡怡。與此異。鄉里歸德。孝辟太尉府。顯宗聞其行。官至長樂衛尉。弟禮爲御史中丞。帝嘉其篤行。寵異之。詔禮十日就長樂衛尉府。太官送供具。相對盡歡。數年。禮卒。令孝從官屬送喪歸也。

### 魏譚

魏譚。字少問。琅邪人。王莽末。政亂。盜賊起。人民相食。譚爲賊所得。等輩數十。皆縛束。當稍就噉。見譚貌謹。敕獨放。令主炊養。有賊長公哀。譚謂曰。汝曹皆當以次死。哀縱汝。急從此去。譚不肯去。叩頭曰。我嘗爲諸君主炊養。食馨肉肌香。餘皆菜食。羸瘦肉腥臊。不可食。願先等輩死。長公義之。卽相謂此兒有義。可哀縱也。賊遂皆放之。數十人皆得脫。譚有一孤兄子。年一二歲。常自養親。遭饑饉。分升合以相存活。譚時有一女。生裁數月。念無穀食。終不能兩全。棄其女。養活兄子。州郡高其義。

### 李善

李善。字次孫。南陽人。本同縣。李元蒼頭。建武中。疫病。元家相繼死沒。惟孤兒續。始生數旬。而有資財千萬。諸奴私共計議。欲謀殺續。分財產。善乃潛負逃亡。隱山陽瑒丘界中。親自哺養。乳爲生。漚。續孩抱奉之。不

異長君有事輒長跪請白。然後行之。閭里感其行。皆相率修義。續年十歲。善與歸本縣。修理舊業。告奴婢于長吏。悉收殺之。時鍾離意爲瑕丘令。上書薦善行狀。

# 東觀漢記卷十八

## 列傳十三

### 第五倫

第五倫字伯魚京兆長陵人修行清白王莽末盜賊起時米石萬錢人相食倫獨收養孤兄下外孫分糧共食死生相守鄉里以此賢之倫步擔往候鮮于褒留十餘日將倫上堂令妻子出相對以屬託焉倫自度仕宦牢落遂將家屬客河東變易姓名自稱王伯齊嘗與奴載鹽北至太原販賣每所至客舍去輒爲糞除道上號曰道士開門請求不復責舍宿直京兆尹閻興召倫爲主簿時長安市未有秩又鑄錢官姦宄所集無能整齊理之者興署倫督鑄錢掾領長安市倫平銓衡正斗斛市無阿枉百姓悅服其後小民爭訟皆云第五掾所平市無姦枉欺詐之巧倫每見光武詔書常歎曰此聖主也當何由一得見決矣等輩笑之曰汝三皇時人也爾說將尙不下安能動萬乘主耶倫曰未遇知己道不同故耳〔案〕范書本傳李賢注引華嶠書曰蓋延代鮮于褒爲馮翊多非法倫數切諫延恨之故滯不得舉將州將謂延也諸王當歸國詔書選三署郎補王家長吏徐倫爲淮陽王醫工長時輩除者多綬盡但假印倫請於王王賜之綬嘗見上曰聞卿爲吏搯妻父不過從兄飯寧有之耶對曰臣三娶妻皆無父臣生遭饑饉米石萬錢不敢妄過人飯曰聞卿爲市掾有人遺卿母一筍餅卿知從

外來奪之。母遂探口餅出之。有諸對曰：實無。此衆人以臣愚蔽，故爲此言也。倫性節儉，作會稽郡。雖爲二千石，臥布被，自養馬，妻炊爨，俸祿常取赤米，與小吏受等。財留一月俸，餘皆賤糶與民。饑羸者爲事徵百姓，攀轅扣馬呼曰：「〔案〕太平御覽作初代到當發百姓老小闔府門攀車扣馬啼呼曰舍我何之。」倫密委去。百姓聞之，乘船追之，交錯水中。其得民心如此。倫免官歸田里，不交通人物，躬與奴共發棘田種麥。倫爲司空，奉公不撓，言事無所依違。諸子諫止，輒叱之。每上封，自作草，不復示掾吏。或民奏記言便宜，便上封。去年伏誅者，刺史一人，太守三人，被死罪二人，凡六人。〔案〕范書本傳：倫爲三公，值帝歷有善政，乃上疏褒稱盛美。去年以下，乃其疏中述近事語。前後文闕。

桓虞

桓虞，字伯春。〔案〕范書章帝紀：李賢注作字仲春。馮翊萬年人，遷尙書僕射，據法斷事。周密平正，以爲能，擢爲南陽太守。

鄧彪

鄧彪，字智伯，南陽人也。父邯，世祖中興從征伐，以功封鄙侯。彪少修孝行，厲志清高，與東郡宗武伯翟敬伯、陳綏伯、張弟伯同志好。齊名稱南陽五伯。彪以嫡長爲世子。邯薨，彪當嗣爵，讓國與異母弟鳳。明帝高其節，詔書聽許。鳳襲爵，彪仕州郡爲太尉，在位清白，以廉讓率下，爲百僚式。視事四年，以疾乞骸骨，賜策罷，贈錢三十萬。所在以二千石俸終其身。

鄭弘



會稽鄭弘字巨君爲鄒縣令魯春雨霜鄒穀獨無災爲太尉以日食免

### 袁安

袁安(案)范書本傳字 卿公汝南汝陽人爲河南尹十餘年政令公平未嘗以賊罪鞠人常歎曰凡士之學高欲望宰相下及牧守錮人於聖代尹不忍爲也和帝始加元服太后詔安爲賓賜束帛乘馬安爲司徒每朝會憂念下室未嘗不流涕

### 朱暉

朱暉字文季南陽人暉之先宋微子之後也以國氏姓周衰諸侯滅宋奔碭易姓爲朱後徙于宛暉外祖父孔休以德行稱於代暉早孤有氣決年十三莽敗天下亂與外氏家屬從田間奔入宛城道遇羣賊賊操弓弩欲裸奪婦女衣服昆弟賓客皆惶迫伏地莫敢動暉拔劍前曰財物皆可取諸母衣不可得今日朱暉死日也賊義其小壯其志笑曰童子內刀遂舍之爲郡督郵太守阮況當嫁女欲買暉婢暉不敢與及況卒暉送其家金三斤人問其故暉曰前不與婢者恐以財汚府君今重送欲明己心也驃騎將軍車平王蒼辟暉爲掾正月旦將軍當奉璧賀故事少府給璧時陰就爲少府吏甚驕慢求不可得暉遙見就主簿持璧謂曰我素聞璧未嘗見借觀之主簿授暉暉授令史主簿遽白就就曰朱掾義士勿求之蒼罷朝謂暉曰掾自視孰與蘭相如再遷臨淮太守暉好節概有所拔用皆厲行之士表善黜惡抑強絕邪歲

常豐熟。吏民畏而愛之。爲之歌曰。強直自遂。南陽朱季。吏畏其威。民懷其惠。建武十六年。四方牛大疫。臨淮獨不疫。鄰郡人多牽牛入界。暉爲守數年。坐考長吏囚死獄中。州奏免官。暉同縣張堪有名德。每與相見。常接以友道。暉以堪宿成名德。未敢安也。堪至。把暉臂曰。欲以妻子託朱生。暉舉手不敢答。堪後仕爲漁陽太守。暉自爲臨淮太守。絕相聞見。堪後物故。南陽餓。暉聞堪妻子貧窮。乃自往候視。見其困厄。分所有以賑給之。歲送穀五十斛。帛五匹以爲常。

### 韋彪

韋彪〔案〕范書本傳。彪字孟達。扶風平陵人。

上議曰。二千石皆以選出京師。剖符典千里。

〔案〕范書本傳。建初中。爲大鴻臚。時陳事者言。郡國貢舉。率非功次。

告在州郡。詔下公卿朝臣議。此蓋彪議中語。范書節去。

### 韋豹

韋豹〔案〕豹字季明。數辟公府。輒以事去。司徒劉愷辟之。謂曰。卿輕人好去就。故爵位不踰。今歲垂盡。當辟。御史意在相薦。子其留乎。豹曰。夫馬齒衰。豈敢久待。論薦之私。非所敢當。遂跳而起。愷追之。遙去不顧。

### 郭躬

郭躬〔案〕范書本傳。躬字仲孫。潁川陽翟人。家世掌法。務在寬平。章和元年。赦天下繫囚。在四月丙子以前。減死罪一等。勿答。詣金城。而文不及亡命。未發覺者。躬上封事曰。伏惟天恩。莫不蕩宥。死罪以下。並蒙更生。而亡命捕得。

獨不沾澤。臣以爲赦前犯死罪而繫在赦後者，可皆勿答。詣金城以全人命，有益于邊，上善之。卽下詔赦焉。

### 鄭均

鄭均，字仲虞，任城人也。治尙書，好黃老，淡泊無欲，清靜自守，不慕游宦。兄仲爲縣游徼，頗受禮遺，均數諫止，不聽。卽脫身出作，歲餘得數萬錢，歸以與兄，曰：「錢盡可復得，爲吏坐贓，終身捐棄，兄感其語，遂爲廉潔。」稱清白吏，均好義篤實，失兄事寡嫂，恩禮敦至，養孤兒，兄子甚篤，已冠娶，出令別居並門，且盡推財與之，使得一尊其母。然後隨護視賑給之，均屢辟不詣公車，特徵拜侍御史，月餘遷尙書，肅宗敬重之。後以病告歸，均遣子英奉章詣闕，詔召見英，問均所苦，賜以冠幘錢布。元和元年，與毛義各賜羊一頭，酒二斗，終其身。帝東巡，過任城，乃幸均舍，敕賜尙書祿以終其身。故時人號爲白衣尙書。

### 王景

王景，〔案〕范書本傳景字仲通，樂浪謁郡人。治浚儀，賜山海經河渠書。建初八年，景爲廬江太守，乃教民種麻桑而養蠶。

### 廉范

廉范，字叔度，京兆人也。祖父客死蜀漢，范年十五，與客步負喪歸。至葭萌，船觸石破沒，范持棺柩，遂俱沈溺。衆傷其義，鉤求得之，僅免於死。太守張穆持筒中布數篋與范，范曰：「石生堅，蘭生香，前後相違，不忍行。」

也。遂不受。爲雲中太守。始到。烽火日通。故事虜出度五千人。乃移書旁郡求助。吏白。今虜兵出五千。請移警檄。范不聽。遂選精兵自將出。至近縣。令老弱城守而追之。爲蜀郡太守。成都邑宇偪側。舊制禁民夜作以防火。而更相隱蔽。燒者日日相屬。范乃毀削前令。但嚴使儲水。百姓爲便。民歌之曰。廉叔度。來何暮。不禁火。民安堵。昔無襦。今五袴。百姓皆喜。家得其願。時生子。皆以廉名者千數。章和二年。帝崩。范奔赴敬陵。還入城。見道中有諸生乘小車。馬頓死泥中。諸生立旁不能自進。時范問爲誰所從來。生白。廬江太守掾嚴麟。爲太守奉章來弔。范惻然。令從騎下馬與之。不告而去。麟事畢。不知馬所歸。緣路訪之。或謂麟曰。故蜀郡太守廉叔度。好賙人窮。今奔國喪。當是時。麟亦素聞范名以爲然。卽牽馬造門謝而歸之。世伏其好義。

王阜

王阜。(案)阜。范書作道。附見南蠻西南夷傳。字世公。蜀郡人。少好經學。年十一。辭父母。欲出精廬。以少不見聽。後阜竊書誦

盡。日辭欲之。槩爲定生學。攜錢二千布兩端去。母追求到武陽北。男謁舍家。得阜將還。後歲餘。白父昇曰。今我出學。仕宦儻至。到今。母乘跛馬車。昇憐其言。聽之。定所受韓詩。年七十。爲食侍謀。童子傳授業。聲

聞鄉里。(案)此段文義雖明。疑有脫誤。補重泉令。政治肅清。舉縣畏憚。吏民向化。鸞鳥集於學宮。阜使五官掾長沙疊爲

張雅樂。擊磬。鳥舉足垂翼。應聲而舞。翺翔復上縣庭屋。十餘日乃去。爲益州太守。邊郡吏多放縱。阜以法

繩正吏民不敢犯禁。政教清靜。百姓安業。神馬四出。滇河中。甘露降。白鳥見。連有瑞應。世謂其用法平正。寬慈惠化所致。大將軍竇憲貴盛。以絳罽襜褕與阜。不受。憲嘗移書益州。取六百萬。阜疑有姦詐。以狀上。憲遣奴騶帳下吏李文迎錢。阜以詔書未報。距不與文。積二十餘日。詔書報給文以錢市焉。

### 秦彭

秦彭字國平。

〔案〕范書本傳作字伯平。扶風茂陵人。

元成間。宗族五人同爲二千石。故號爲萬石秦氏。彭擢開陽城門候。爲

山陽太守。時山陽新遭地動。後饑旱。穀貴。米石七八萬。百姓窮困。彭下車經營勞來。爲民設四誠。以定父母妻子長幼之序。擇民能率衆者。以爲鄉三老。選鄉三老爲縣三老。令與長吏參職。崇儒雅。貴庠序。尙德化。不任刑名。春秋饗射。升降揖讓。務禮示民。吏民畏愛。不敢欺也。後拜潁川太守。老弱啼號滿道。彭在潁川。鳳凰麒麟嘉禾甘露之瑞。集于郡境。

### 玄賀

玄賀字文弘。

〔案〕常璩華陽國志作字文和。宕渠人。

遷鄴令。政化大行。爲九江太守。行縣齋持乾糲。但就溫湯而已。臨去日。

百姓扶車叩馬。啼泣隨之。

### 曹褒

曹褒字叔通。

〔案〕范書本傳。褒魯國薛人。

篤學有大度。常慕叔孫通爲漢禮儀。晝夜沉思。寢則懷鉛筆。行則誦文書。當

其念至。忽忘所之。舉孝廉。拜車府令。在射聲營舍。有停棺不葬者百餘所。喪親自履行。問其意。故吏對曰。此等多是建武以來。絕無後者。喪愴然。爲買空地。悉葬其無主者。設祭以祀之。遷城門校尉。將作大匠。時疾疫。喪愴哀病。徒親自省治。醫藥饘粥。多蒙濟活。

### 賈逵

賈逵字景伯。(案)范書本傳。長八尺二寸。能講左氏及五經本文。以大小夏侯尚書教授。京師爲之語曰。問事不休。賈長頭。永平十七年。公卿以神雀五采。翔集京師。奉觴上壽。上召逵。敕蘭臺給筆札。使作神雀頌。建初元年。詔逵入北宮虎觀。南宮雲臺。使出左氏大義書奏。上嘉之。賜布五百匹。衣一襲。拜侍中。領騎都尉。內備帷幄。兼領祕書近署。甚見信用。

### 江革

江革字次翁。(案)范書本傳。客東海下邳。傭賃以養父母。下邳知其孝。市買輒與。好善者雖無錢。任貫與之。革專心養母。幅巾屐履。母年八十。革不欲搖動之。常自居轅輓車。不用牛馬。永平中。拜五官中郎將。每朝會。帝常使虎賁扶持。及進拜。恆自禮焉。時有疾。不會。輒敕大官送餐醪。恩寵莫與爲比。于是京師貴戚。順陽侯衛尉馬廖。侍中竇憲。慕其行。各奉書致禮遺。革終不發書。無所報受。帝聞而益善之。

### 召馴

召馴字伯春〔案〕范書本傳。以志行稱。鄉里號之曰德行。恂恂召伯春。以明經有智讓。講論拜議郎。〔案〕范書

本傳不載。馴曾為議郎。章和中為光祿勳。

李育

李育字元春〔案〕范書本傳。育扶風漆人。為侍中。時章帝西謁園陵。育陪乘。問舊事。育輒對。由是見重。

杜安

杜安字伯夷。潁川定陵人。貴戚慕其名。或遺其書。安不發。悉壁藏之。後捕貴戚賓客。安開壁出書。而封如故。由是不罹其患。

杜根

和熹鄧后臨朝。權在外戚。杜根〔案〕根安子。范書本傳。根字伯堅。以安帝年長。宜親政事。乃與同舍郎上書直諫。太后大怒。收執根等。令盛以縑囊。于殿上撲殺之。執法者以根知名。私語行事人。使不加力。既而載出城外。根得蘇。太后使人檢視。遂詐死三日。目中生蛆。因得逃竄。及鄧氏誅。根方歸。徵拜侍御史。

杜篤

杜篤字季雅〔案〕范書本傳。篤京兆杜陵人。客居美陽。與美陽令交遊。數從請託。不諧。頗相恨。令怒。收篤送京師。會大司馬吳漢薨。世祖詔諸儒誄之。篤于獄中為誄辭最高。帝美之。賜帛免刑。仕郡文學掾。以目疾二十餘年不

窺京師。篤外高祖辛武賢。以武略稱。篤常歎曰。杜氏文明善政。而篤不任爲吏。辛氏秉義經武。而篤又怯于事。外內五世。至篤衰矣。

### 宋揚

宋揚。扶風平陵人。永寧二年。遣大鴻臚持節至墓。追封當陽侯。(案)范書清河王慶傳。揚女爲章帝貴人。生清河王慶。慶長子祐嗣立。是爲安帝。追

謚宋貴人曰敬隱后。追封謚揚爲當陽侯。

### 趙興

司隸校尉下邳趙興。不卹諱忌。每入官舍。輒更繕修館宇。移穿改築。故犯妖禁。而家人爵祿益用豐熾。官至潁川太守。子峻。太傅。以才器稱。孫安世。魯相。三葉皆爲司隸。時稱其盛。

### 趙勤

趙勤。字益卿。(案)太平御覽作字孟卿。南陽人。劉賜姊子。童幼有志操。賜國租適到。時勤在旁。賜指錢示勤曰。拜乞汝

二十萬。勤曰。拜而得錢。非義所取。終不肯拜。(案)此段一本作勤少孤。嘗從人貸錢。或以錢示勤。勤明達。曰。汝起拜。卽與汝。勤曰。拜汝得錢。非義。終不肯拜。勤明達

好學。介然特立。太守賂珍。召署曹吏。至掾督郵。爲南陽太守。桓虞功曹。委以郡事。虞下車。葉令雍霸及新

野令皆不遵法。乃署勤督郵。到葉見霸。不問縣事。但高譚清論。以激勵之。霸卽解印綬去。勤還入新野界。

令聞霸已去。遣吏奏記陳罪。復還印綬去。虞乃嘆曰。善吏如良鷹矣。下韡卽中。嘗有重客過。欲屬一士。令



爲曹吏。虞曰：我有賢功曹趙勤，當與議之。客潛于內中聽。虞乃問勤。勤對曰：恐未合衆。客曰：止止，勿復道。

毛義

廬江毛義，性恭儉謙約。少時家貧，以孝行稱。爲安陽尉。南陽張奉慕其義，往候之。坐定而府檄到，當守令。義奉檄而入，白母，喜動顏色。

淳于恭

淳于恭，字孟孫，北海人。以謙儉推讓爲節。家有山田橡樹，人有盜取之者，恭助爲收拾，載之歸。乃知是橡，盜載橡還之。恭不受。人又有盜刈恭禾者，恭見之，念其愧，因自伏草中。至去乃起。養兄崇孤兒，教誨學問。時不如意，輒呼責數，以捶自擊其脛，欲感之。兒慙負，不敢復有過。恭家井在門外，上有盆，隣里牧牛而爭飲牛，恭惡其爭，多置器其上，爲預汲水滿之。小兒復爭，恭各語其父母，父母乃禁怒之。里落皆化而不爭。

梁鴻

梁鴻，〔案〕范書本傳鴻字伯鸞，扶風平陵人。少孤，以童幼詣太學受業。治禮詩春秋，常獨坐止，不與人同食。比舍先炊已，呼鴻及熱釜炊。鴻曰：童子鴻，不因人熱者也。滅竈更燃火。鴻家貧而尚節，博覽無不通。畢乃牧豕于上林苑中，曾誤遺火，延及他舍，乃尋訪燒者，問所失財物，悉推豕償之。其主猶以爲少。鴻曰：無他財，願以身居作。

主人許。因爲執勤不懈。耆老見鴻。非恒人。乃共責讓主人。而稱鴻長者。于是始敬鴻。還其豕。鴻不受。初與京邑蕭友善。約不爲陪臣。及友爲郡吏。鴻以書責之而去。鴻鄉里孟氏女。容貌醜而有節操。多求之不肯。父母問其所欲。曰得賢壻如梁鴻者。鴻聞乃求之。（案）太平御覽作梁鴻妻。同郡孟氏。其女名光。狀醜而肥。力舉石臼。擇對不嫁。願得如鴻者。至年三十。鴻聞聘之。女椎髻著布衣。操作具而前。鴻大喜。曰此真梁鴻妻也。能奉我矣。字之曰德耀。名孟光。將妻之。霸陵山耕耘織作以供衣食。彈琴誦詩以娛其志。鴻將之會稽。作詩曰。維季春兮華阜。麥含金兮方秀。適吳依大家。臯伯通廡下爲賃舂。每歸妻爲具食。不敢于鴻前仰視。舉案常齊眉。伯通察而異之。曰彼傭賃。能使其妻敬之如此。非凡人也。鴻常閉戶吟詠書記。遂潛思著書十餘篇。鴻病。因與伯通及會稽士大夫語。曰昔延陵季子葬子于贏博之間。不歸其鄉。慎勿聽妻子持尸柩去。後伯通等爲求葬處。有要離冢高燥。衆人曰。要離古烈士。今伯鸞亦清高。令相近。遂葬要離冢傍。子孫歸扶風。

高鳳

高鳳。字文通。南陽人。誦讀晝夜不絕。妻嘗之田。曝麥于庭。以竿授鳳。令護雞。鳳受竿誦經如故。天大雷暴。雨淹沒。鳳留意在經史。忽不視麥。麥隨水漂去。鄉里有爭財持兵而鬪。鳳往解之。不已。乃脫巾請曰。仁義遜讓。奈何棄之。爭者感之。收兵謝罪。鳳年老。執志不倦。聲名著聞。太守連召請。恐不得免。自言鳳本巫家。不應爲吏。又與寡嫂詐訟田。遂不仕。

郭鳳

郭鳳字君張勃海人善說災異吉凶占應病先自知嘗豫令弟子市棺斂具至其日而卒



# 東觀漢記卷十九

## 列傳十四

張酺

張酺字孟侯。〔案〕范書本傳酺汝南細陽人。祖父充與光武同門學。光武卽位求問充。充已死。永平九年詔爲四姓小侯。開學置五經師。酺以尙書授于南宮。令入授皇太子。太子家時爲奢侈物。未嘗不正諫。甚見重焉。顯宗以酺授皇太子業。甚得輔導之體。章帝卽位出拜東郡太守。賜錢三十萬。酺下車擢賢俊。擊豪強。賞賜分明。郡中肅然。薦郡吏王青三世死節。青從此除步兵司馬。酺傷青不遂。復舉其子孝廉。元和二年帝東巡狩。幸東郡。引酺及門生郡縣掾吏竝會庭中。帝先備弟子之儀。使酺講尙書一篇。使尙書令王鮪與酺相難。然後修君臣之禮。賞賜殊特。帝甚欣悅。酺罰斷義勇。遷魏郡太守。百姓垂涕送之。滿道。和帝初。酺上言。臣聞王者法天。癸惑奏事太微。故州牧刺史入奏事。所以通下問。知外事也。數十年以來。重其道歸。煩擾。故時止勿奏事。今因以爲故事。臣愚以爲刺史視事滿歲。可令奏事如舊典。問州中風俗。恐好惡過所道。事所聞見。考課衆職。下章所告。及所自舉有意者。賞異之。其尤無狀。逆詔書。行罪法。冀敕戒其餘。令各敬慎所職。于以衰滅貪邪便佞。酺拜太尉。詔射聲校尉曹褒案漢舊儀。制漢禮。酺以爲褒制禮。非禎祥之特達。

有似異端之術。上疏曰：褒不被刑誅，無以絕毀實亂道之路。酺爲太尉，父尙在，酺每遷轉，乃一到雒，父來。適會正臘，公卿罷朝，俱賀歲，奉酒上酺，父壽極歡，莫不嘉其榮，以日食免。

韓稜

韓稜，字伯師，潁川人也。除爲下邳令，視事未朞，吏人愛慕。時鄰縣皆雹傷稼，稜縣界獨無雹，遷南陽太守。下車表行義，拔幽滯，發摘姦盜，郡中震慄，權豪懾伏，政號嚴平。

巢堪

巢堪，字次朗，太山南城人，爲司空十四年，自乞上印綬，賜千石俸。

魯恭

魯恭，字仲康，扶風人。父建武初爲武陵太守，卒官。時恭年十二，弟丕年七歲，晝夜號踊不絕聲，郡中賻贈無所受，及歸，服喪禮過成人。耽思閉門講誦，兄弟雙高。太尉趙熹聞恭志行，每歲遣人送米肉，辭讓不敢當。恭憐丕小，欲先就其名，託病不仕，郡數以禮請，謝不肯應。母強遣之，恭不得已而行，因留新豐教授。建初中，丕舉秀才，恭乃始爲郡吏，拜中牟令。宿訟許伯等爭陂澤田，積年州郡不決，恭平理曲直，各退自相責讓。時郡國螟傷稼，犬牙緣界，不入中牟。河南尹袁安聞之，疑其不實，使仁恕掾肥親往察之，恭隨行，阡陌俱坐桑下，有雉過，止其旁，旁有童兒，親曰：何不捕之？兒曰：雉方將雛，親默然有頃，與恭訣曰：所以來者。

欲察君治迹耳。〔案〕此句太平御覽作本來者君界有無蟲耳。今蟲不犯境。此一異也。化及鳥獸。此二異也。豎子有仁心。此三異

也。府掾久留。但擾賢者。因還府具以狀白。安帝時伐匈奴。恭上疏諫曰。竊見竇憲耿秉。銜使奉命。暴師于

外。陛下親勞。憂在軍役。誠欲以安定邊陲。為民除害。臣思之。未見其便。數年以來。民食不足。國無蓄積。盛

春興發。擾動天下。妨廢農時。以事夷狄。非所以垂意于中國。憫念民命也。恭上疏曰。舉無遺策。動不失其

中。〔案〕此疏前後文闕。范書不載。未知何時所上。

### 魯丕

魯丕。字叔陵。性沈深好學。孳孳不倦。〔案〕虞世南北堂書鈔作專心于學。朝夕孜孜。兼通五經。以魯詩尚書教授。為當世大儒。拜

趙相。為政尚寬惠禮讓。雖有官。不廢教。門生就學百餘人。關東號曰五經復興魯叔陵。

### 徐防

徐防。〔案〕范書本傳防字謁。卿沛國銓人。上疏曰。試論語本文。章句但通度。勿以射策。冀令學者務本。有所一心。專精師門。

思核經意。事得其實。道得其真。於此宏廣經術。尊重聖業。有益于化。雖從來久。六經衰微。學問寢淺。誠宜

反本。改矯其失。安帝元年。郡國被水災。比州湮沒。死者以千數。災異數降。西羌反叛。殺略人吏。京師淫雨。

蠹賊傷稼穡。防比上書曰。陳過咎。遂策免。〔案〕范書本傳防時為太尉。參錄尚書事。虞世南北堂書鈔云。以日蝕免。與此異。

### 陳寵

陳寵字昭公。沛國人。曾祖父咸。哀平間以明律令爲侍御史。王莽篡位。父子相將歸鄉里。閉門不出。乃收家中律令文書壁藏之。以俟聖主。咸常戒子孫曰。爲人議法。當依于輕。雖有百金之利。慎毋與人重比。故世人謂陳氏持法寬。寵辟司徒鮑昱府。掾屬專尙交遊。以不肯親事爲高。寵常非之。獨勤心物務。爲尙書性純淑。周密慎重。時有表薦。輒自手書削草。人莫得知。常言人臣之義。苦不畏慎。自在樞機。謝遣門人。不復教授。絕知友之路。章帝時。決獄多近于重。寵上疏諫曰。先王之政。賞不僭。刑不濫。與其不得已寧僭。故古賢君相歎息重戒者。重刑之至也。爲廣漢太守。先是雒陽城南。每陰雨。常有鬼哭。聲聞于府中。寵使案行。昔歲倉卒時。骸骨不葬者多。寵乃敕縣埋葬。由是卽絕。爲廷尉。有疑獄。輒手筆作議。所活者甚多。

陳忠

陳忠〔案〕忠。寵子。范書本傳。忠字伯始。爲尙書令。數進忠言。辭采鴻麗。前後所奏。悉上于官閣。以爲故事。疏曰。語云迎新千里。送舊不出門。〔案〕此疏前後文闕。范書不載。未知何時所上。

尹勤

尹勤字叔梁。南陽人。治韓詩。事薛漢。身牧豕。事親至孝。無有交遊。門生荆棘。

何熙

何熙字〔案〕此下溫。〔案〕范書本傳作熙。身長八尺。體貌魁梧。與人絕異。和帝偉其貌。特拜謁者。熙能爲威。



容贊拜殿中。聲動左右。爲御史中丞。羣僚憚之。

### 魏霸

魏霸字喬卿。(案)一本濟陰人也。建初中爲郎。霸孤兄弟子來候。霸以所乘車馬遣送之。至成臯。郎官有

乘皂蓋車者。見兄子乘車。疑而格殺之。霸聞悲淚。晝夜泣涕。至病。爲鉅鹿太守。妻子不到官舍。常念兄與

嫂在家勤苦而已。獨尊樂。故常服麤糲。不食魚肉之味。婦親蠶桑。服機杼。子躬耕農。與兄弟子同苦樂。不

得有異。鄉里慕其行化之。性清約質樸。爲政寬恕正色而已。不求備于人。掾吏有過。輒私責數。不改。休罷

之。終不暴揚其惡。爲將作大匠。吏皆懷恩。人自竭節作業。無譴過之事。延平元年。仕爲光祿大夫。(案)范

延平元年。霸爲太常。明年。以病致仕。爲光祿大夫。此延平元年。下當有闕文。霸妻死。長兄伯爲霸取妻。送至官舍。霸笑曰。年老。兒子備具矣。何

用空養他家老嫗爲。卽自入辭。其妻手奉案前。詭霸曰。夫人視老夫。復何中而遂失計。義不敢相屈。卽拜

而出。妻慚求去。遂送還之。

### 應順

應順字華仲。汝南南頓人。少與同郡許敬善。敬家貧。親老無子。爲敬去妻更娶。爲東平相。事後母至孝。精

誠感應。梓樹生廳前屋上。徙置府庭。繁茂長大。

### 應奉

應奉〔案〕奉順曾孫范〔案〕奉本傳奉字世叔為武陵太守與學校舉側陋政稱遠邇

應劭

應劭〔案〕劭字仲遠〔案〕仲遠范書本傳李賢注引續漢書文士傳作仲授漢官儀又作仲瑗未知孰是父奉司隸校尉劭少便篤學博覽多聞

鄭璩

鄭璩〔案〕璩范書張酺傳作璩字平卿黎陽人建初五年辟司徒府拜侍御史上疏曰臣斗筲之小吏擢在察視之官

職任過分當刺邪矯枉詔書示官府曰璩盡節剛正亦何陵遲之有賜璩素六十四由是顯名轉司隸校尉為漢陽太守以嚴刻見稱

樂恢

樂恢字伯奇〔案〕恢京兆長陵人父親為縣吏有罪令欲殺之恢年十一常伏寺東門外凍地晝夜啼泣令乃

出親京兆尹張恂召恢署戶曹吏竇憲出征匈奴恢上書諫曰春秋之義王者不理夷狄得其地不可墾發得其人無益于政故明王之于夷狄羈縻而已孔子曰遠人不服則修文德以來之以漢之盛不務修舜禹周公之德而無故興干戈動兵革以求無用之物臣誠惑之

何敞

何敞生成為漢膠東相成生果為太中大夫果生比干為丹陽都尉遷廷尉正張湯為廷尉以殘酷見任

增飾法律。比干常爭之。存者千數。比干生壽。蜀郡太守。壽生顯。京輔都尉。顯生鄢。光祿大夫。鄢生寵。濟南都尉。寵生敝。〔案〕范書本傳。敝字文高。扶風平陵人。爲汝南太守。百姓化其恩禮。高譚等百八十五人。推財相讓。

### 周榮

周榮。〔案〕范書本傳。榮字平孫。廬江舒人。爲尚書令。在納言管機密。盡心奉職。夙夜不怠。

### 梁諷

梁諷。北地弋居人。征匈奴。屯軍于邊。以大漢威靈招之。匈奴畏感。奔馳來降。諷輒爲信旆。遣還營。前後萬餘人。相屬于道。

### 李恂

李恂。〔案〕范書本傳。恂字叔英。安定臨涇人。遭父母喪。六年。躬自負土樹柏。常在冢下。爲兗州刺史。所種小麥胡蒜。悉付從事。一無所留。清約率下。常席羊皮布被。食不二味。爲張掖太守。有威重名。時大將軍竇憲將兵屯武威。天下州郡遠近。莫不修禮遺。恂奉公不阿。爲憲所奏免。復徵爲西域副校尉。西域殷富多珍寶。諸國侍子及督使賈胡。數遺恂奴婢宛馬金銀香鬪之屬。一無所受。遷武威太守。後坐事免。無田宅財產。居山澤。結草爲廬。餉遺無所受。處新安關下。拾橡實爲食。

### 王渙

王渙〔案〕范書本傳渙字稚子河內溫人除河內溫令商賈露宿人開門臥人爲作謠曰王稚子代未有平徭役百姓喜爲雒陽令盜賊發不遠走或藏溝渠或伏甕下渙以方略取之皆稱神明馬市正數從買羹飯家乞貸不得輒毆罵之至忿渙聞知事實便諷吏解遣

黃香

黃香字文彊江夏安陸人也父況舉孝廉爲郡五官掾貧無奴僕香躬執勤苦盡心供養冬無被袴而親極滋味暑卽扇牀枕寒卽以身溫席年九歲失母慕思憔悴殆不免喪鄉人稱其至孝年十二博覽傳記家業虛貧衣食不贍舅龍鄉侯爲作衣被不受帝賜香淮南孟子各一通〔案〕范書本傳時元和初年香爲郎中詔令詣東

觀讀所未嘗見書謂諸王曰此日下無雙江夏黃童也詔詣安福殿賜錢三萬黃白絺各一端香知古今記羣書無不涉獵兼明圖讖〔案〕兼明太平御覽作兼好天官星氣鍾律厯算窮極道術京師號曰天下無雙國士瞻

重京師貴戚慕其聲名更饋衣物拜尙書郎嘗獨止宿臺上晝夜不離省闕上聞善之以香父尙在賜臥几靈壽杖香拜左丞功滿當遷詔書留增秩拜尙書遷僕射香上疏曰以錐刀小用蒙見宿留爲尙書曉習邊事每行軍調度動得事理上知其勤數加賞賜香勤力憂公畏慎周密每用奏議所建畫未嘗流布然事執平法常持輕類全活非一爲魏郡太守俗每太守將交代添設儲峙輒數千萬香未入界移敕悉出所設什器及到頗有卽徹去到官之日不祭竈求福閉門絕客

黃瓊

黃瓊〔案〕瓊香子字世英。以德行高妙。公車徵拜議郎。

黃琬

黃琬〔案〕琬琬孫字子琰。少失父。曾祖香。祖瓊。並有高名。

張霸

張霸字伯饒。蜀郡成都人。年數歲。有所噉。必先讓父母。鄉里號曰張曾子。九歲通春秋。復欲進業。父母語汝小。何能多少。以樊條刪嚴氏公羊春秋。猶多繁詞。乃減為二十萬言。更名張氏之學。

周紆

周紆字文通〔案〕范書本傳。紆下邳人。為勃海太守。詔書到門。不出。先遣吏到屬縣。盡決罪行刑。坐徵詣廷尉繫獄。數日免歸。家貧無以自贍。身築塹以自給食。章帝知憐之。復以為郎。

李充

李充〔案〕范書本傳。充字大遜。陳留人。兄弟六人。出入更衣。家貧親老。充妻勸異居。充使釀酒會親戚。充啓其母曰。此婦勸異居。不可奉祭祀。請去之。遂叱去其婦。魯平為陳留太守。請充署功曹。充不受。平怒。乃援充以捐溝中。因謫署都亭長。

司馬均

司馬均字少賓。東萊人。隱居教授。誠信行乎州里。鄉人有爭曲直者。輒言敢祝少賓乎。心不直者。終不敢祝也。

汝郁

汝郁字叔異。陳國人。年五歲。母被病不能飲食。郁常抱持啼泣。亦不飲食。母憐之。強爲餐飯。欺言已愈。郁視母色未平。輒不食。宗親共異之。郁再徵。載病詣公車。尙書敕郁自力受拜。郁乘輦白衣詣。止車門臺。遣兩當關扶郁入拜郎中。

張表

張表字公儀。奉之子也。〔案〕范書張奉附見劉平諸人傳。序表不載。遭父喪。疾病曠年。目無所見。耳無所聞。服闋。醫藥救療。歷歲乃瘳。每彈琴。惻愴不能成聲。見酒食。未嘗不泣。宗人親厚。節會飲食。宴爲表不設樂。

郭玉

郭玉者。〔案〕常璩華陽國志。玉字通直。廣漢人也。學方診之伎。和帝奇異之。乃試令嬖臣美手腕者。與女子雜處帷中。使玉各診一手。玉言左陽脈。右陰脈。有男女疾。若異人。臣疑其故。帝歎稱善。

鄭衆〔案〕范書有宦者傳。載鄭衆以下九人。攷劉知幾史通謂桓帝令崔寔等作孫程傳。稱程爲順帝功臣。則知本書不別立宦者傳。今從之。編附于各朝諸臣後。用見當曰。史官曲筆。爲記述者。

戒

鄭衆字季產。〔案〕范書本傳衆南陽犍人。爲人謹敏有心。永平中初給事太子家。肅宗卽位拜小黃門。遷中常侍。和帝初竇太后秉政。兄大將軍憲等並竊威權。朝臣上下莫不附之。而衆獨一心王室。不事豪黨。帝親信焉。及憲兄弟圖作不軌。衆遂首謀誅之。以功遷大長秋。





# 東觀漢記卷二十

## 列傳十五

張敏

張敏〔案〕范書本傳敏字伯達河間鄭人拜司空

以行大射禮陪位頓仆乃策曰今君所苦未瘳有司奏君年體衰羸郊廟禮儀仍有曠廢鼎足之任不可以缺重以職事留君其上司空印綬

楊震

楊震字伯起弘農人受歐陽尚書于桓郁明經博覽無不窮究諸儒爲之語曰關西孔子楊伯起震公廉不受私謁子孫常蔬食步行故舊長者或欲令爲開產業震不肯曰使後世稱爲清白吏子孫以此遺之不亦厚乎爲東萊太守道經昌邑邑令王密故所舉茂才夜懷金十斤以遺震震曰故人知君君不知故人何也密曰夜無知者震曰天知神知何謂無知爲太尉性忠誠每陳諫諍中常侍樊豐等譖之收印綬歸本郡震到雒陽都亭顧謂子及門生曰吾蒙恩居上司姦臣狡猾而不能誅寵嬖傾亂而不能禁帑藏虛賞賜不節而不能寒何面目以見日月遂飲酖而死

楊秉

楊秉〔案〕秉震仲子。范書本傳時帝書本傳秉字叔節。諫桓帝曰：王者至尊，出入有常，警蹕而行。〔案〕范書本傳時帝數微行，故秉有是諫。

楊賜

楊賜〔案〕賜秉子。字伯獻，光和中，有虹蜺晝降嘉德殿，上引賜等入金商門崇德署，問以祥異，對曰：案春秋識

曰：天投蜺，天下怨，海內亂，加四百之期，象見吉凶，聖人則之。今妾媵嬖人，闔尹之徒，共專國朝，欺罔日月，

而令搢紳之徒，委伏畎畝，口誦堯舜之言，身蹈絕俗之行，亡損溝壑，不見逮及，冠履倒易，陵谷代處。〔案〕范書

本傳：賜時爲光祿大夫。賜代劉郃爲司徒，帝欲造畢圭靈昆苑，賜上疏諫曰：竊聞使者並規度城南民田，欲以爲苑，

昔先王造囿，裁足以修三驅之禮，薪萊芻牧，皆悉往焉。先帝之制，左開鴻池，右作上林，不奢不約，以合禮

中，今猥規郊城之地，以爲苑圃，廣壞田園，廢民居，畜禽獸，殆非所謂保赤子之義。以病罷居，無何拜太常，

詔賜御府衣一襲，自所服冠幘，綬玉壺革帶金錯鈎佩。

任尙

任尙編草爲船，置于簿上，以渡河，掩擊羌胡。

薛苞

汝南薛苞〔案〕范書劉平等諸人傳序苞作苞。字孟常，喪母，以孝聞，父娶後妻，而憎苞，分出，日夜號泣，不能去，至被毆杖，不

得已，廬于舍外，旦入而洒掃，父怒，又逐之，乃廬于里門，晨昏不廢，積歲餘，父母慙而還之。

馮良

馮良字君郎南陽人少作縣吏恥在廝役因壞車殺馬毀裂衣冠從杜撫學

所輔

所輔平原人爲縣門下小吏縣令劉雄爲賊所攻欲以矛刺雄輔前叩頭以身代雄賊等遂戟刺輔貫心洞背卽死東郡太守捕得賊具以狀上詔書傷痛之

蔡倫

蔡倫字敬仲桂陽人爲中常侍有才學盡忠重慎每至休沐輒閉門絕賓客曝體田野典作尙方造意用樹皮及敝布魚網作紙〔案〕一本作倫典尙方作紙用故麻名麻紙木皮名穀紙魚網名網紙元興元年奏上之帝善其能自是莫不用天下咸稱蔡侯紙

龐參

龐參字仲達〔案〕范書本傳參河南緱氏人拜漢陽太守郡民任業者有奇節參到往候之棠不與言但以籬一本水一杯置戶屏前自抱孫兒伏于戶下參思其微意良久曰棠是欲曉太守也水者欲吾清也拔大本籬欲吾擊強宗也抱兒當戶欲吾開門恤孤也于是歎息而還參在職果能抑豪助弱以惠政得民爲太尉以災異策免

李固

李固字子堅。漢中南鄭人也。司徒郃之子。固貌狀有奇表。鼎角匿犀。足履龜文。少好學。常步行隨師。不遠千里。

張耽

張耽將吏兵。繩索相懸。上通天山。

左雄

劉據爲大司農。以職事被譴。召詣尚書。將加箠撻。尚書左雄案范書本傳。雄字伯豪。南郡涅陽人。諫帝曰。九卿位亞三公。行則鳴玉。孝明永平。始加撲罪。非古制也。帝從之。卿于是始免撲箠。

周舉

周舉字宣光。案范書本傳。舉汝南汝陽人。姿貌短陋。而博學洽聞。爲儒者所宗。京師語曰。五經縱橫。周宣光。

張綱

梁冀作平上駟車。侍御史張綱。案范書本傳。綱字文紀。犍爲武陽人。獨埋輪于雒陽都亭。曰。豺狼當道。安問狐狸。遂奏冀。

王堂

王堂。案范書本傳。堂字敬伯。廣漢鄭人。爲汝南太守。教掾吏曰。其憲章朝右。委功曹陳蕃。

吳祐

吳祐字季英。陳留人。父恢爲南海太守。祐年十二。恢欲殺青簡以寫經書。祐諫曰。今大人踰越五嶺。遠在海濱。其俗舊多珍怪。此書若成。則載之兼兩。昔馬援以薏苡興謗。王陽以衣囊微名。嫌疑之間。誠先賢所慎也。恢乃止。撫其首曰。吳氏世不乏季子矣。年二十。喪父獨居。家無擔石。而不受贍遺。常牧豕于長垣澤中。行吟經書。遇父故人。謂之曰。卿二千石子。而杖鞭牧豕。縱子無恥。奈君父何。祐辭謝而已。守志如初。公沙穆遊太學。無資糧。乃變服客傭。爲祐賃舂。祐與語。大驚。遂共訂交于杵臼之間。遷膠東相。〔案〕范書本傳。祐舉孝廉。以光祿四行。遷膠東侯相。政惟仁簡。以身率物。民有相爭訴者。輒閉閣自責。然後科其所訟。以道譬之。或身到閭里。重相和解。自是爭隙省息。吏民不欺。

祝良

祝良字邵平。長沙人。爲雒陽令。常侍樊豐妻殺侍婢。置井中。良收其妻殺之。

朱遂

中山相朱遂到官。不出奉祠北嶽。詔曰。災暴緣類。符驗不虛。政失厥中。狼災爲應。至乃殘食孩幼。朝廷感悼。思維咎徵。博訪其故。山嶽尊靈。國所望秩。而遂比不奉祠。怠慢廢典。不務懇惻。淫刑放濫。害加孕婦。毒流未生。感和致災。其詳思改救。追復所失。不有遵憲。舉正以聞。〔案〕司馬彪五行志。陽嘉元年十月。益都蒲陰。狼殺兒童九十七人。故有是詔。范書

載失

丘騰

丘騰知罪法深大懷挾姦巧稽留道路下獄死。

韓昭

韓昭強賦一億五千萬檻車徵下獄。

趙序

趙序取錢縑三百七十五萬。

孫程

孫程字稚卿北新城人衛康叔之胄孫林父之後爲中黃門安帝崩初江京等譖誣太子廢爲濟陰王居西鍾下徵北鄉侯爲嗣。(案)范書安帝紀及本傳此句上下當有闕文程謀誅江京于盛化門外與馬國等相見詐謂馬國曰天子與我棗脯與若棗者使早成之程等十八人收斬江京閻顯等迎立濟陰王是爲順帝閻顯弟景爲衛尉從省中還外府收兵至盛德門尙書郭鎮率直宿羽林出逢景景因斫鎮不中鎮劍擊景墮車左右以戟叉其胸禽之送廷尉以功封程爲浮陽侯萬戶又封中黃門王康華容侯王國鄴侯。

苗光

孫程賦棗脯分與苗光曰以爲信今暮其當著矣漏盡光爲尙席直事通燈解劍置外持燈入章臺門程等適入光走出門欲取劍王康呼還光不應光得劍欲還入門已閉光便守宜秋門會李閏來出光因與俱迎濟陰王幸南宮雲臺詔書錄功臣令康疏名康詐疏光入章臺門光謂康曰緩急有問者當相證也詔書封光東阿侯食邑四千戶未受符策光心不自安詣黃門令自告有司奏光欺詐主上詔書勿問遂封東阿侯邑千戶

籍建

中常侍籍建追封爲汝陰東鄉侯





# 東觀漢記卷二十一

## 列傳十六

胡廣

胡廣〔案〕范書本傳廣字伯始南郡華容人爲太傅總錄尙書事時年八十而心力克壯母在堂朝夕瞻省旁無几杖言不稱老達練事體明解朝章雖無饒直之風屢有補裨之益

陳龜

陳龜〔案〕范書本傳龜字叔珍上黨泫氏人爲五原太守後卒西域胡夷并涼民庶咸爲舉哀弔祭其墓

劉祐

劉祐〔案〕范書本傳祐字伯祖中山安國人爲河東太守時屬縣令長率多中官子弟百姓患之祐到摧其權強平理冤結政爲三河表

李雲

桓帝誅大將軍梁冀而中常侍單超等五人皆以誅冀功竝封列侯又立掖庭民女亳氏爲皇后數月間后家封者四人賞賜巨萬時地數震裂衆災頻降白馬令李雲〔案〕范書本傳雲字行祖甘陵人素剛憂國乃露布上書

移副三府。曰孔子曰：帝者諦也。今官位錯亂，小人諂進，財貨公行，政令日損，是帝欲不諦乎？帝得奏震怒，下有司，送雲黃門北寺獄。弘農五官掾杜衆，傷其忠直獲罪，上書願與雲俱得死，遂俱死獄中。

韋毅

韋毅為陳留太守。桓帝延熹九年坐賊自殺。

宗資

汝南太守宗資。〔案〕范書本傳李賢注引謝承書云：資字叔都，南陽安衆人。任用善士，朱紫區別。

陳蕃

陳蕃。〔案〕范書本傳蕃字仲舉，汝南平輿人。為光祿勳，上疏切諫云：鄙諺曰：盜不過五女門，以女能貧家也。今後宮之女數千，食肉衣綺，豈不貧國乎？〔案〕范書本傳：桓帝時封賞論制，內寵猥盛，蕃上疏諫，帝頗納其言。

段熲

段熲字紀明。〔案〕范書本傳：熲武威姑臧人。有文武智略。時東郭寶公孫舉等聚衆三萬人為亂，遣兵討之，連年不克。桓

帝詔公卿選將有文武者，司徒尹詛薦熲，乃拜為中郎將。熲到，設施方略，旬月羣盜悉破。熲破羌胡。〔案〕范書

類傳：時延熹二年，明年春，餘羌復寇張掖。熲自下馬大戰，力盡，羌亦引退。熲追之，晝夜兼行，食雪四十餘日。熲上

疏曰：先零諸羌討之難破，降為上策，戰為下計。〔案〕范書本傳：熲期於誅盡諸羌。太后詔云：此以慰仲光

馬賢等亡魂也。〔案〕范書本傳靈帝建寧元年春。類大破先零諸種于達義山。時竇太后臨朝。下詔褒類。此其詔文。類曰：張奐事勢相反，遂懷猜恨。〔案〕范

建寧元年夏，類復敗羌。時張奐上言：羌種難盡，宜以恩降，詔書下類。故類上奏辨之。此其奏中請。類起於徒中，爲并州刺史，滅羌有功，後徵還京師。類乘

輕車，介士鼓吹，曲蓋朱旗，馬騎五萬餘匹，般天蔽日，鉦鐸金鼓，雷震動地，連騎繼跡，彌數十里。詔賜錢千

萬，七尺絳襜褕一領，赤幘大冠一具。類上言：掠得羌侯君長金印四十三，銅印三十一，錫印一枚，長史司

馬涉頭長燕烏校棚水塞尉印五枚，紫綬三十八。〔案〕太平御覽作紫綬十七，艾綬二十八。黃綬二枚，皆簿入也。

### 劉寬

劉寬〔案〕范書本傳寬字文饒，弘農華陰人。爲南陽太守，溫仁多恕，吏民有過，但用蒲鞭罰之，示辱而已。寬簡略嗜酒，嘗有

客遣蒼頭市酒，迂久大醉而還，客不堪之，罵曰：畜產，寬須臾遣人視奴，疑必自殺。顧左右曰：此人也，罵言

畜產，辱孰甚焉。吾懼其死也。寬夫人試寬意，伺當朝會，裝嚴已訖，使婢奉肉羹，翻污朝衣，婢遽收之。寬神色不異，乃徐語曰：羹爛汝手。

### 陳球

陳球〔案〕范書本傳球字伯真，下邳淮浦人。爲繁陽令，清高不動。

### 張奐

張奐字然明。〔案〕范書本傳奐，敦煌酒泉人。爲安定屬國都尉，羌離補上奐馬二十匹。〔案〕范書本傳時先零酋長仍遣奐金八枚，故奐有使金如粟之

語此有。免召主簿張祁入于羌前以酒酹地曰使馬如羊不以入廄使金如粟不得入懷盡還不受使匈奴〔案〕范書本傳免由安定屬國都尉遷使匈奴中郎將此有闕文。休屠各及朔方烏桓竝同反叛遂燒度遼將軍門列屯赤地煙火相望兵衆大恐各欲亡去免安坐帷中與弟子誦書自若軍士稍安桓帝時爲武威太守其妻懷孕夢見帶免印綬登樓而歌乃訊之于占者曰必生男復臨茲邦命終此樓旣而生猛以建安中爲武威太守前刺史邯鄲商爲猛所殺據郡反爲韓遂所攻州兵圍之急猛自知必死恥見禽乃登樓自焚而死。

### 陽球

陽球字方正〔案〕范書本傳球漁陽泉州人爲司隸校尉詣闕上書謝恩表言常侍王甫罪過奔車收送詔獄自臨考之父子皆死于杖下乃磔甫尸署曰賊臣王甫于是權門惶怖股慄莫不雀目鼠步京師肅然曹節見甫尸乃收淚入言球罪帝徙爲衛尉球叩頭曰願假臣一月必令豺狼鴟梟悉伏其辜。

### 趙咨

趙咨字文楚東郡燕人至孝躬率子孫耕農爲養盜嘗夜往劫之咨恐母驚惶乃先至門迎盜因請爲設食謝曰老母八十疾病須養居貧無儲乞少置衣糧妻子餘物無所惜諸盜皆慚嘆跪曰所犯無狀干暴賢者言畢奔走大司農陳奇〔案〕范書本傳陳琦舉咨至孝。

### 荀曼

荀曇字元智。潁川潁陰人。爲廣陵太守。正身疾惡。其兄昱爲沛相。乃相與共除闞黨。後昱與大將軍竇武謀誅中官。與李膺俱死。曇亦禁錮終身。

### 符融

符融。(案)范書本傳。融字偉明。陳留浚儀人。妻亡。貧無殯斂。鄉人欲爲具棺服。融不肯受。曰。古之亡者。棄之中野。惟妻子可以行之。但卽土埋藏而已。

### 高彪

高彪。(案)范書本傳。彪字義方。吳郡無錫人。除郎中。校書東觀。後遷外黃令。畫彪形像。以勸學者。

### 范丹

范丹。字史雲。(案)范書本傳。丹。陳留內黃人。爲萊蕪長。遭黨錮事。推鹿車載妻子。捃拾自資。有時絕糧。丹言貌無改。閭里歌之曰。甑中生塵。范史雲。釜中生魚。范萊蕪。

### 韓卓

韓卓。字子助。陳留人。臘日。奴竊食祭其母。卓義其心。卽日免之。

### 曹節

曹節。(案)范書本傳。節字漢豐。南陽新野人。上書曰。功薄賞厚。誠有踧踖。(案)此書未知何時所上。要是濫賞時僞讓之辭。

皇甫嵩

皇甫嵩〔案〕范書本傳嵩字義真安定朝那人。上言四姓權右咸各斂手。

王允

尚書令王允〔案〕范書本傳允字子師太原祁人。奏曰太史令王立說孝經六隱事能消却姦邪常以良日允與立入為帝誦孝經一章以丈二竹篋畫九宮其上隨日時而出入焉及允被害乃不復行也。

趙溫

趙溫字子柔蜀郡成都人初為京兆郡丞歎曰大丈夫生當雄飛安能雌伏遂棄官而去後官至三公。

孔融

孔融〔案〕范書本傳融字文舉魯國人。上書曰先帝褒厚老臣懼其隕越是故扶接助其氣力三公刺掖近為憂之非警戒也云備大臣非其類也。

蔡邕

蔡邕〔案〕范書本傳邕字伯喈陳留圉人。詔問有黑氣墮溫明殿東庭中如車蓋騰起奮迅五色有頭體長十餘丈形似龍似虹蜺邕對虹著於天而降施于庭以臣所聞則所謂天投蜺者也〔案〕司馬彪五行志此虹晝見御座殿庭前色青赤上引邕問之對曰虹蜺小女子之祥〔案〕范書靈帝紀此光和元年六月事。邕徙朔方上書求還。

續成十志。〔案〕劉昭續漢書注載崑所上書略云臣自在布衣常以爲漢書十志下盡王莽而世祖以來惟紀傳無續志者臣所師事故太傅胡廣知臣頗識其門戶略以所有舊事與臣雖未備悉粗見首尾積累思惟二十餘年不在其位非外吏庶人所得擅述天誘其衷得備著作郎建言十志皆當撰錄遂與議郎張華等分受之難者皆以付臣先治律歷以籌算爲本天文爲驗請太史舊注攷校連年往參思圖牒尋擇適有增損乃可施行爲無窮法道至深微不敢獨議郎中劉洪密于用算故臣表上洪與共參思圖牒尋擇適有增損乃可施行爲無窮法道至深微不敢獨議郎中劉洪密于用算故臣表上洪與思中道廢絕不得究竟誠恐所懷隨軀腐朽抱恨黃泉遂不設施謹先類陪科條諸志臣欲刪定者一願當接續者四前志所無臣欲著者五及經典羣書所宜拊摭本奏詔書所當依據分別首目并書章左顧下東觀推求諸奏參以璽書以補綴遺闕昭明文體攷第十意卽十志也范書本傳李賢注載十意之目云律歷意第一禮意第二樂意第三郊祀意第四天文意第五車服意第六餘闕又劉知幾史通稱邕于烹平中作朝會車服二志知十意中當有朝會蓋邕所作十意今得其七其三篇則不可攷云

周秘

周秘。〔案〕范書秘見董卓袁紹諸傳以秘爲漢陽豫州刺史慎之子也。人李賢注引英雄記作周慈字仲遠武威人

劉翊

劉翊。〔案〕范書本傳翊字子相潁川潁陰人爲汝南太守舉郡人許靖計吏察孝廉除尙書郎典選舉

郭汜

獻帝幸弘農郭汜。〔案〕范書董卓傳李賢注引日擄掠百官婦女有美髮者皆斷取之。劉艾獻帝紀云汜張掖人

呂布

呂布。〔案〕范書本傳布字奉先五原九原人以奮威將軍如三事。

蔣疊

(案)蔣疊以下二十八人未審係何時代他書亦無可攷編附于此

蔣疊字伯重爲太僕久在臺閣文雅通達明故事在九卿位數言便宜奏議可觀

須誦

須誦爲郡主簿獲罪詣獄引械自楛口口出齒獲免

馮模

馮模爲司空坐隴西太守鄧融免官

周行

周行爲涇令下車嚴峻貴戚跼蹐京師肅清

劉訓

劉訓拜車府令時東州郡國相驚有賊轉至京師吏民驚皆奔城郭訓卽夜詣省欲令將近兵據門以禦之

雍儵

雍儵字長魚事母至孝母嘗病癰儵晝夜匍伏不離左右至爲吮癰

梁福



司部災蝗。臺召三府驅之。司空掾梁福曰。普天之下。莫非王土。不審使臣驅蝗何之。災蝗當以德消。不聞驅逐。時號福爲真掾。

范康

范康爲司隸校尉。務大綱。性節儉。常臥布被。

蔣翊

蔣翊字元卿。後母憎之。伺翊寢。操斧斫之。值翊如廁。

宗慶

宗慶字叔平。爲長沙太守。民養子者三千餘人。男女皆以宗爲名。

郝刪

郝刪字次孫。早孤。以至孝稱。值天下亂。野無烟火。而刪獨在家側。每賊過。見其尙幼而有志節。奇而哀之。

喜夷

喜夷爲壽陽令。蝗入輒死。

李庸

李庸爲蜀郡太守。蜀之珍玩不入於門。益州紀其政化。

巴异

巴异爲重泉令。吏民向化。鸞鳥止學宮。

卜福

卜福爲廷尉。執謙求退。上以爲太中大夫。

陳導

光武賜陳導駭犀劍。

楊喬

揚喬曰。臣伏見二千石。典牧千里。

翟歆

翟歆字敬子。父子以功封臨沮侯。歆當嗣爵。以母年老國遠。上書辭讓。詔許。乃賜關內侯。

魏成

魏成曾孫純。坐訐誣國除。

畢尋

利取侯畢尋。玄孫守。坐姦人妻國除。

段普

首鄉侯段普曾孫勝。坐殺婢國除。

邢崇

夕陽侯邢崇孫之爲賊所盜。亡印綬國除。

陰猛

陰猛好學溫良。稱于儒林。爲太祝令。以博通古今遷太史令。

羊融

羊融字子優。爲大司農。性明達。稱爲名卿。

張意

張意拜驃騎將軍。討東甌。備水戰之具。一戰大破。所向無前。

沈豐

沈豐字聖達。爲零陵太守。爲政慎刑重殺。罪法辭訟。初不歷獄。嫌疑不決。一斷于口。鞭杖不舉。市無刑戮。僚友有過。初不暴揚。有奇謀異略。輒爲談述。曰太守所不及也。到官一年。甘露降。芝草生。

蕭彪

蕭彪字伯文京兆杜陵人累官巴郡太守父老乞供養父有賓客輒立屏風後應受使命父嗜餅每自買進之。

陳囂

陳囂字君期習韓詩語曰關東說詩陳君期。

# 東觀漢記卷二十二

## 列傳十七列女 外裔

### 鮑宣妻

鮑宣之妻桓氏女也。字少君。宣嘗就少君父學。父奇其清苦。以女妻之。裝送甚盛。宣不悅。謂妻曰。少君生而驕富。習美飾。而吾貧賤。不敢當禮。妻曰。大人以先生修德守約。故使賤妾侍執巾櫛。既奉君子。惟命是從。妻乃悉歸侍御服飾。更著短布裳。與宣共挽鹿車。歸鄉里。拜姑。禮畢。提甕出汲。修行婦道。鄉邦稱之。

〔案〕鮑宣已見班書。此篇以補其闕。范書列女傳襲之。

### 江伯姊

山陽郡人江伯欲嫁姊。姊引鎌欲自割。

### 匈奴南單于

單于比匈奴頭曼十八代孫。十二月癸丑。匈奴始分爲南北單于。〔案〕范書本傳。此爲建武二十四年事。單于歲祭三龍祠。走馬鬪橐駝。以爲樂事。建武二十六年。南單于遣使獻駱駝二頭。文馬二匹。南單于來朝。賜御倉及橙橘龍眼荔枝。〔案〕范書光武紀及本傳。並未有單于來朝事。此文疑誤。南單于上書獻橐駝。賜谷蠡王玉具劍羽蓋車一駟。中郎將持節

衛護焉。〔案〕范書和帝紀此賜北單于之谷蠡王於除韃也。上遣單于饗賜作樂百戲。上幸離宮臨觀。〔案〕范書順帝紀此漢安二年夏六月事。

祚都夷

遠夷樂德歌詩曰。提官傀搆。大漢是治。魏冒踰糟。與天意谷。罔驛劉脾。吏譯平端。旁莫支留。不從我來。微衣隨旅。聞風向化。知唐桑

艾。所見奇異。邪毗緝補。多賜緝布。推潭僕遠。甘美酒食。拓拒蘇便。昌樂肉飛。局後仍離。屈申悉備。僂讓龍洞。蠻夷贊薄。莫支度由。無所報嗣。陽

雒僧麟。願主長壽。莫稗角存。子孫昌熾。遠夷慕德歌詩曰。僂讓皮尼。蠻夷所處。且交陵悟。日入入部。繩動隨旅。慕義向化。路且揀雒

歸日。聖德渡諾。聖德深恩。魏菌度洗。與人富厚。綜邪流藩。冬多霜雪。祚邪尋螺。夏多和雨。藐潯瀘灘。寒溫時適。菌補邪推。部人辟危

歸險。涉危歷險。莫受萬柳。不遠萬里。術疊附德。去俗歸德。仍路孳摸。心歸慈母。遠夷懷德歌詩曰。荒服之儀。荒服之外。犁籍憐憐。土

境。阻蘇邪犁。食肉衣皮。莫碭蘿沫。不見鹽穀。罔譯傳微。吏譯傳風。是漢夜拒。大漢安樂。蹤優恪仁。攜負歸仁。雷折險龍。禍冒險狹。倫狼藏

幢。高山峻嶒。扶路側祿。綠崖磧石。息落服淫。木薄發家。理瀝毘維。百宿到維。捕蒞菌毘。父子同賜。懷豪匹漏。懷抱匹帛。傳言呼敕。傳告種人。陵

陽臣僕。長願臣僕。〔案〕范書本傳永平中益州刺史朱輔宣示漢德白狼槃木唐敢等百餘國慕化歸

詩此文提官傀搆以下並夷人本語注大漢是治云云則田恭所譯華言載之范書者也。

西羌

西羌祖爰劍。為秦所奴隸。而亡藏巖穴中。見焚。有影象如虎。為蔽火。得不死。諸羌以為神。推以為豪。護羌竇林奉使羌。顛岸降。詣林。林欲以為功效。奏言大豪。後顛岸兄顛吾復詣林。林言其第一豪。問事狀。林對

前後兩屈林以誣罔詣獄。上不忍誅，免官。後涼州刺史奏林賊罪，復收繫羽林監，遂死獄中。〔案〕顛岸顛  
濱〔案〕此上  
吾〔案〕此上  
文關  
金城隴西卑滿勒姐種羌反，出塞外。

西域

永元二年，安息王獻條支大雀。此雀卵大如甕。





# 東觀漢記卷二十三

## 載記

劉玄〔案〕載記之名爲史記漢書所未有。此本書創例也。劉知幾史通題目篇云：東觀以平林下江諸人列爲載記。古今正史篇又云：明帝詔班固陳宗尹敏孟冀作世祖本紀，並撰功臣及新市平林公孫述事，作列傳。載記二十八篇，改新市平林發難最先，公孫述削平獨後。史通舉此以包載記之終始，則知其他專兵竊據者，盡當列諸載記。故今自更始而下，以類編入。

劉玄字聖公，光武族兄也。弟爲人所殺，聖公結客欲報之。客犯法，聖公避吏于平林。吏繫聖公父子張、聖公詐死，使人持喪歸舂陵。吏乃出子張。聖公因自逃匿。王莽末，南方饑饉，人庶羣入野澤，掘鳧苽而食，更相侵奪。新市人王匡、王鳳爲平理，爭訟遂推渠帥衆數百人，諸亡命往從之。數月間，至七八千人，號新市兵。平林人陳牧、廖湛復聚千餘人，號平林兵。聖公入平林中，與伯升會，遂共圍宛。聖公號更始將軍，自破甄阜等衆，庶來降十餘萬。將立劉氏。南陽英雄皆歸望于伯升。然漢兵以新市、平林爲本，其將帥素習聖公，因欲立之。而朱鮪立壇城南清水上，詣伯升，呂植通禮經爲謁者，將立聖公爲天子，議以示諸將。馬武王匡以爲王莽未滅，不如且稱王。張卬拔劍擊地曰：稱天公尙可，稱天子何謂不可？于是諸將軍起，聖公至于壇所，奉通天冠，進聖公。于是聖公乃拜冠南面而立，改元爲更始元年。光武爲太常偏將軍，破二公子于昆陽城，而更始收劉稷及伯升，卽日皆物故。光武馳詣宛謝罪，更始大慙。長安中兵攻王莽，斬首收璽。

綬詣宛。更始入，便坐黃堂上視之，曰：「莽不如如此，當與霍光等。」更始韓夫人曰：「莽不如如此，帝那得爲之。」更始北都雒陽。李松等自長安傳送乘輿服御物及中黃門從官至雒陽。關中咸想望天子。更始遂西發雒陽。李松奉引車馬，奔觸北闕鐵柱門，三馬皆死。更始至長安，居東宮，鐘鼓帷帳，宮人數千，官府閭里安堵如舊。更始上前殿，郎吏以次侍。更始媿慙，俯刮席，與小常侍語。郎吏怪之。更始納趙萌女爲后，有寵。遂委政于萌。日夜與婦人歡讌後庭。羣臣欲言事，輒醉不能見，時不得已，乃令侍中坐帷內與語。諸將識非更始聲，出皆怨之。更始韓夫人尤嗜酒，每侍飲，見常侍奏事，輒怒曰：「帝方對我飲，正用此時持事來乎？」起，抵破書案，所置牧守交錯。州郡不知所從。趙萌以私事責侍中，侍中曰：「陛下救我。」更始言大司馬縱之。萌曰：「臣不受詔，遂斬之。」又所置官爵皆出羣小，三輔苦之。被服不法，或繡面衣錦袴，諸于襜褕。〔案〕姚之駟本作被服威儀，不以衣冠幘而服婦人衣，諸于襜褕。皆罵詈道路，爲百姓之所賤。長安中爲之歌曰：「竈下養，中郎將，爛羊胃，騎都尉，爛羊頭，關內侯，官爵多羣小，里閭語曰：使兒居市決，作者不能得，傭之市空返。問何故？曰：今日騎都尉往會日也。」由是四方不復信向京師。雒陽人韓鴻爲謁者。更始二年，使持節降河北，拜除二千石。其冬赤眉十餘萬人入關。徐宣、樊崇等入至弘農，枯樅山下，與更始將軍蘇茂戰。崇北至莠鄉，轉至湖，赤眉引兵入上林。更始騎出廚城門，諸婦女皆從後車呼。更始當下拜城。更始下爲拜謝城乃去。至高陵，光武聞更始失城，乃下詔封更始爲淮陽王，而赤眉劉盆子亦下詔以聖公爲長沙王，仍許來降。〔案〕此下有闕文。上璽綬。

赤眉乃封爲畏威。〔案〕此下脫一侯字。赤眉〔案〕此上下均有闕文。謝祿曰。〔案〕此上當脫去張印等謂四字。三輔兵侈欲得更始。一旦失之。

〔案〕此下有闕文。詔鄧禹收葬霸陵。東海公賓就〔案〕大公賓就。申屠志皆更始所封。陳遵爲更始三輔豪傑入長安。

攻未央宮。庚戌。〔案〕班書王莽傳。庚戌更始元年十月三日也。范書光武紀則以誅莽爲九月事。杜虞殺莽于漸臺。〔案〕杜虞。班書作杜吳。東海公賓就得

其首傳詣宛封滑侯。

### 申屠志

申屠志以功封汝陰王。上書以非劉氏。還玉璽。改爲潁陽侯。〔案〕志。范書不載。更始傳有申屠建封平氏王。而以非劉氏辭。王封者乃朱鮪也。此文疑

誤。

### 陳遵

陳遵〔案〕班書游俠傳。遵字孟公。杜陵人。使匈奴。詔賜駁犀劍。

### 劉盆子

赤眉欲立宗室。以木札書符曰上將軍。與兩空札置箚中。大集會三老從事。令劉盆子等。〔案〕范書本傳。盆子。太山式人。

三人居中央。〔案〕三人謂盆子及其兄茂與前西安侯劉孝。一人奉符。以年次探之。盆子最幼。探得將軍。三老等皆稱臣。盆子年

十五。被髮徒跣。卒見衆拜。恐懼啼泣。從劉俠卿居。〔案〕卒吏劉俠卿主芻牧牛。僭立後復還依俠卿。俠卿爲制

朱絳單衣。半頭赤幘。直綦履。盆子朝夕朝。俠卿禮之。數祠城陽景王。〔案〕城陽景王。卽未虛侯章也。盆子乃其裔孫。樊崇等以巫言景王大怒。

而立。使盆子乘車入長安。時掖庭中宮女猶有數百千人。自更始敗後。幽閉殿內。拔庭中蘆葍根。捕池魚而食之。赤眉遇光武軍。驚震不知所爲。乃遣劉恭乞降。曰：盆子將百萬衆降。陛下何以待之。上曰：待汝以不死耳。盆子及丞相徐宣以下二十餘萬人肉袒降。奉高皇帝傳國璽。詔以屬城門校尉。賊皆輸鎧仗。積兵甲宜陽城西。與熊耳山齊。

赤眉

〔案〕樊崇等皆劉盆子臣。故編其後。

琅邪人樊崇。字細君。起兵于莒。同郡東莞人逢安。字少子。東海臨沂人。徐宣。字驕穉。謝祿。字子奇。及楊音。各起兵數萬人。崇欲與王莽戰。恐其衆與莽兵亂。乃皆朱其眉。以相識別。由是號曰赤眉。赤眉入安定北地。至陽城。逢大雪。士卒多凍死。光武作飛蟲箭以攻赤眉。赤眉平。後百姓飢餓。人相食。黃金一斤。易豆五斗。

呂母

〔案〕呂母。范書附劉盆子傳。故今編赤眉傳後。

海曲有呂母。其子爲縣吏。犯小罪。縣宰殺之。呂母家素富。豐贖產。乃益釀醇酒。少年來沽者。貫之。視其乏者。輒假衣裝。少年欲相與償之。呂母垂泣曰：縣宰枉殺吾子。欲報怨耳。諸君寧肯哀之乎。少年許諾。遂相聚得數百人。因與呂母入海。自稱將軍。遂破海曲。執縣宰。斬之。以其首祭子冢。呂母賓客徐次子等。自號搃虎。

王郎〔案〕范書王昌傳昌一名郎趙國邯鄲人

宮婢生子正與同時即易之〔案〕范書本傳初王莽篡位長安中或自稱成帝子子與者莽殺之郎緣是

遂佞身就館趙后欲害之僞易他人子知命者侍郎韓公等〔案〕范書本傳趙繆王子林立郎為天子移

以故得全云云此即王郎惑衆之辭也

帝子子與者也昔遭趙氏之禍因以王莽篡殺賴知命者將王郎遣諫議大夫杜威持節詣軍門上遣檄

盧芳

盧芳字君期安定人屬國胡數千畔在參蠻芳從之詐姓劉氏自稱西平王會匈奴句林王將兵來降參

蠻胡芳因隨入匈奴留數年單于以中國未定欲輔立之遣母樓且渠王求入五原與假號將軍李興等

結謀興北至單于庭迎芳芳外倚匈奴內因興等故能廣略邊郡

蘇茂

蘇茂陳留人殺淮陽太守得其郡營廣樂大司馬吳漢圍茂茂將其精兵突至湖陸與劉永相會

彭寵

彭寵字伯通南陽宛人也父容〔案〕范書本傳容作宏哀帝時為漁陽太守有名于邊容貌飲食絕衆是時單于來

朝當道二千石皆選容貌飲食者故容徙為雲中太守寵為漁陽太守容貌絕衆〔案〕此恐即寵父容事而探掇者誤屬之寵

朱浮密奏寵。上徵之。寵既自疑。其妻勸寵無應徵。今漁陽大郡。兵馬衆多。奈何爲人所奏而棄此去。寵與所親信吏計議。吏皆怨浮。勸寵止不應徵。寵妻夢羸袒冠幘踰城。髡徒推之。又寵堂上聞蝦蟆聲。在火爐下。鑿地求之不得。詔討寵者封侯。寵奴子密等三人。共謀劫寵。寵時齋。獨在便坐室中晝臥。子密等三人縛寵著牀板。告外吏。大王解齋。吏皆便休。又用寵聲呼其妻入室。見寵。驚曰。奴反。奴乃捽其妻頭。擊其頰。寵曰。趣爲諸將軍辦裝。兩奴將妻入取寵物。一奴守寵。寵謂奴曰。若小兒。我素所愛。今解我縛。當以女珠妻若。小奴見子密聽其語。遂不得解。子密收金玉衣物。使寵妻縫兩縑囊。夜解寵手。令作記告城門將軍。云。今遣子密等詣子后蘭卿所。其開出。勿稽留。書成。卽斷寵及妻頭。置縑囊中。西入上告。朝廷以奴殺主。不義。復不可封。乃封子密爲不義侯。

張豐

涿郡太守張豐舉兵反。初豐好方術。有道士言豐當爲天子。以五綵囊盛石繫豐肘。云石中有玉璽。豐信之。遂反。旣敗。當斬。猶言肘有玉璽。椎破之。豐乃知被詐。仰天歎曰。當死無所恨。

秦豐

秦豐。卽縣人。少學長安。受律令。歸爲縣吏。更始元年起兵。攻得卽宜城。若編臨沮。中沮。廬襄陽。鄧新野。穰湖陽。蔡陽。兵合萬人。

鄧奉

光武以鄧奉爲輔漢將軍。奉拒光武瓜里。(案) 范書岑彭傳。建武二年。帝遣吳漢伐南陽。諸賊漢軍所過。多侵暴。時鄧奉謁歸新野。怒漢掠其鄉里。遂據清陽反。三年。帝自將南征。破斬之。

龐萌

龐萌。山陽人。爲平狄將軍。與蓋延共擊董憲。詔書獨下延而不及萌。萌以爲延譖己。自疑遂反。上聞之。大怒。乃自將兵討萌。與諸將書曰。吾常以龐萌爲社稷臣。將軍得無笑其言乎。

隗囂

隗囂。字季孟。天水人也。囂既立。使聘平陵方望爲軍師。望至。說囂曰。足下欲承天順民。輔漢而起。今立者乃在南陽。王莽尙據長安。雖欲以漢爲名。其實無所受命。將何以見信于衆。宜急立高廟。稱臣奉祠。所謂神道設教。求助民神者也。且禮有損益。質文無常。削地開兆。茅茨土階。以致其肅敬。雖未備物。神明其舍。諸囂從其言。以王莽篡逆。復漢之祚。乃立高祖太宗之廟。稱臣執事。史奉璧而告。祝畢。有司穿坎于庭。割牲而盟。光武與囂書曰。蒼蠅之飛。不過三數步。託驥之尾。得以絕羣。囂故宰府掾吏。善爲文書。每上書移檄。士大夫莫不諷誦。囂將王元說囂曰。昔更始西都。四方響應。天下喁喁。謂之太平。一旦敗壞。今南有子陽。北有文伯。江湖海岱。王公十數。而欲牽儒生之說。棄千乘之基。計之不可者也。今天水完富。士馬最強。

北取西河。東收三輔。案秦舊跡。表裏山河。元請以一丸泥。爲大王東封函谷關。此萬世一時也。若計不及此。且蓄養士馬。據隘自守。曠日持久。以待四方之變。圖王不成。其弊猶足以霸。囂然其計。杜林先去。餘稍相隨。東詣京師。光武賜囂書曰。吾年已三十餘。在兵中十歲。所更非一。厭浮語虛辭耳。岑彭與吳漢圍囂于西城。敕彭書曰。西城若下。便可將兵南擊蜀虜。人苦不知足。旣平隴。復望蜀。每一發兵。頭鬢爲白。漢圍囂。囂窮困。其大將王捷登城呼漢軍曰。爲隗王城守者。皆必死無二心。願諸將軍亟罷。請自殺以明之。遂刎頸而死。時民饑饉。乃噉弩煮履。建武九年正月。囂病且餓。出城餐糗糒。悲憤腹脹而死。囂負隴城之固。納王元之說。雖遣子春卿入質。猶持兩端。光武于是稍黜其禮。正君臣之義。(案)此六句當是序中語。

公孫述

公孫述。字子陽。扶風茂陵人。述之先。武帝時以吏二千石。自無鹽徙。成帝末。述父仁爲侍御。任爲太子舍人。稍增秩爲郎。初垣副以漢中亭長聚衆降宗成。自稱輔漢將軍。述攻成。大破之。副殺成降。蜀郡功曹李熊說述曰。方今四海波蕩。匹夫橫議。將軍割據千里。地方十城。若奮發盛德。以投天隙。霸王之業成矣。宜改名號。以鎮百姓。述曰。吾亦慮之。公言起我意。于是自立爲蜀王。熊復說述曰。今山東饑饉。人民相食。兵所屠滅。城邑丘墟。蜀地沃野千里。土壤膏腴。果實所生。無穀而飽。女工之業。覆衣天下。名材竹幹。不可勝用。又有魚鹽銀銅之利。浮水轉漕之便。北據漢中。杜褒斜之塗。東守巴郡。拒扞關之口。地方數千餘里。戰



士不下百萬衆。見利則出兵而略地。無利則堅守而力農。東下漢水以窺秦地。南順江流以震荆揚。所謂用天因地。成功之資也。君有爲之聲聞于天下。而名號未定。志士狐疑。宜卽大位。使遠人有所依歸。述夢有人語之曰。八子系十二爲期。覺語其妻。對曰。朝聞道。夕死尙可。况十二乎。有龍出其府殿中。夜有光耀。述以爲符瑞。因稱尊號。自立爲天子。改元曰龍興。造十層赤樓。述自言手文有奇瑞。〔案〕范書本傳述刻其掌文曰公孫帝數移書中國。上賜述書曰。瑞應手掌成文。亦非吾所知。承赤者黃也。姓當塗。其名高也。平陵人。荆邯以東方漸平。兵且西向。說述曰。兵者帝王之大器。古今所不能廢也。昔秦失其守。豪傑竝起。漢祖無有前人之迹。立錐之地。于戰陣之中。躬自奮擊。兵破身困。數矣。然軍敗復合。創愈復戰。何則。死而功成。愈于坐而滅亡。臣之愚計。以爲宜及天下之望未絕。豪傑尙可招誘。急以此時發國內精兵。令田戎據江南之會。倚巫山之固。築壘守堅。傳檄吳楚。長沙以南。必隨風而靡。令延岑出漢中。定三輔。天水隴西拱手自服。如此海內震搖。冀有大利。今東帝無尺土之柄。驅烏合之衆。跨馬陷敵。所向輒平。不亟乘時與之分功。而坐談武王之說。是效隗囂欲爲西伯也。述然邯言。欲悉發北軍屯士及山東客兵。使延岑田戎分出兩道。與漢中諸將合兵并勢。蜀人及其弟光以爲不宜空國千里之外。決成敗于一舉。固爭之。述乃止。隗囂敗。述懼欲安其衆。成都郭外有秦時舊倉。改名白帝倉。自王莽以來常空。述詐使人言。白帝倉出穀如山陵。百姓空市里往觀之。述乃大會羣臣。問曰。白帝倉出穀乎。皆對言無。述曰。訛言不可信。道隗王破者復如此矣。

漢兵守成都。述謂延岑曰：「事當奈何？」岑曰：「男兒當死中求生，可坐窮乎？財物易聚耳，不宜有愛。」述乃悉散金帛，募敢死士五千餘人，以配岑。于市橋僞建旗幟，鳴鼓挑戰，而潛遣奇兵出吳漢軍後，襲擊破漢。漢墮水，緣馬尾得出。

延岑

〔案〕岑與田戎皆臣於述，故編其後。

延岑字叔牙，筑陽人。〔案〕范書公孫述傳作南陽人。岑衣虎皮，襜褕，宿下邑亭。亭長白言：「睢陽賊衣絳罽，稽今宿客疑是。」乃發卒來，岑臥不動，吏謝去。

田戎

田戎，西平人，與同郡人陳義客夷陵，爲羣盜。更始元年，義戎將兵陷夷陵，義自稱黎丘大將軍，戎自稱掃地大將軍。戎至期日，灼龜卜降，兆中坼，遂止不降。〔案〕范書岑彭傳建武四年，戎聞秦豐被圍，刻期日降，敢降，後爲岑彭所破，亡降公孫述。

銅馬等羣盜

銅馬賊帥東山荒秃、上淮況等，大彤渠帥樊重，尤來渠帥樊崇，五校賊帥高扈，檀鄉賊帥董次仲，五樓賊帥張文，富平賊帥徐少，獲索賊帥古師郎等。

東觀漢記卷二十四

佚文〔案〕本書單文碎句無篇可歸者別為佚文編次如左

元始元年拜王舜為太保〔案〕以下三條俱姚之駟本此見班書王莽傳舜莽從弟本書載此當是徵引及之也

丁明代傅喜為大司馬亦任事頗害賢寵及丞相王嘉死明甚憐之上寢重賢欲極其位而恨明如此遂

策免明上印綬還第〔案〕此見班書佞倖傳賢謂董賢本書當亦引及

詔曰三輔皆好彈一大老從旁舉身曰噫唏哉〔案〕此見虞世南北堂書鈔未知何帝詔文

後漢有南宮北宮承光宮也〔案〕以下二條俱永樂大典本此見北堂書鈔與後漢霍光薨賜繡被百領〔案〕此亦見北堂書鈔

元年營造明堂靈臺辟雍此即明三事不同也〔案〕此條見歐陽詢藝文類聚攷范書光武紀中元元年

晰之語未知何人所陳

漢有沛宮甘泉宮龍泉宮太一宮思子宮後漢有胡桃宮〔案〕此條見徐堅初學記

栗駭蓬轉因遇際會〔此〕以下六條俱見文選李善注

太史曰忠臣畢力

詔曰。吏安其職。民樂其業。

北裔寇作。無雞鳴狗吠之聲。

千里無烟火。

使先登偵之言虜欲去。

詔書。今功臣家自記功狀。不得自增加以變時事。或自道先祖形貌表相。無益事實。復曰。齒長一寸。龍顏

虎口。奇毛異骨。形容極變。亦非詔書之所知也。〔案〕以下二條俱見太平御覽。

揚雄好著書而口吃。不能劇談。

附東觀漢記范書異同〔案〕本書與范書異同者。具見於李賢注。李注中所引本書原委分明。或其可句讀者。統編於後。若本書有明文而范書刪落者。附焉。

范書光武紀。建武元年。光武北擊尤來。大搶五幡於元氏。追至右北平。連破之。李賢注。北平縣屬中山國。今易州永樂縣也。案東觀記。續漢書。並無右字。此加右。誤也。營州西南別有右北平郡故城。非此地。

范書和帝紀。永元四年夏六月。詔收捕竇憲。射聲校尉郭璜下獄死。李賢注。郭況子。東觀記。璜作瑄。

范書和帝紀。永元九年。擢國重譯奉貢。李賢注。擢。東觀記作擅。

范書和帝紀。永元十一年。復置右校尉官。李賢注。東觀記曰。置在西河鵠澤縣。

范書和帝紀。永元十六年十一月。行幸緱山。登百岬山。李賢注。卽柏岬山也。在洛州緱氏縣南。爾雅云。山一成曰岬。東觀記作岬。

范書和帝紀。元興元年五月癸酉。雍地裂。李賢注。東觀記曰。右扶風雍地裂。流俗本雍下有州者誤也。范書安帝紀。永初四年夏四月。六州蝗。李賢注。東觀記曰。司隸豫兗徐青冀六州。

范書安帝紀。元初四年秋七月。京師及郡國十雨水。詔曰。月令仲秋。養衰老。授几杖。行糜粥。方今案比之時。郡縣多不奉行。李賢注。東觀記曰。方今八月案比之時。謂案驗戶口次比之也。

范書安帝紀。延光四年春三月。帝崩。立章帝孫濟北惠王壽子北鄉侯懿。李賢注。東觀記及續漢書。並曰北鄉侯贖。今作懿。蓋二名。

范書順帝紀。陽嘉二年冬十月庚午。行禮辟雍。奏應鍾。始復黃鍾。作樂器。隨月律。李賢注。東觀記曰。元和以來。音戾不調。復修如舊典。

范書桓帝紀。建和元年。陳留盜賊李堅。自稱皇帝。伏誅。李賢注。東觀記曰。江舍及李堅等。范書桓帝紀。延熹二年。燒當等八種羌叛。寇隴右。護羌校尉段熲。追及於羅亭。破之。李賢注。東觀記曰。

追到積石山。卽與羅亭相近。今鄯州。范書清河孝王慶傳。永元十五年。有司以日食陰盛。奏遣諸王侯就國。詔曰。且復須留。李賢注。東觀記。

須留作宿留。

范書鄧訓傳。時迷吾子迷唐。別與武威種羌合兵萬騎。來至塞下。未敢攻訓。先欲脅月氏胡。訓擁衛稽故。令不得戰。李賢注。稽故謂稽留事故也。東觀記。稽故字作諸胡也。

范書吳漢傳。漢擊破五校賊於臨平。追至東郡箕山。大破之。北擊清河長直及平原五里賊。皆平之。李賢注。東觀記及續漢書。長直並作長垣。案長垣縣名在河南。不得言北擊。范書作長直。當是賊號。或因地以爲名。

范書賈復傳。復馬羸。光武解左驂以賜之。李賢注。東觀記。續漢書。左並作右。

范書耿秉傳。秉與竇固擊車師。車師後王安得。令其諸將迎秉。秉大怒。被甲上馬。麾其精騎馳赴之。安得惶恐。走出門。脫帽抱馬足降。李賢注。東觀記曰。脫帽趨抱馬蹠也。

范書耿恭傳。三月至玉門。李賢注。五門關名。屬敦煌郡。在今沙州。臣賢案酒泉郡又有玉門縣。東觀記曰。至敦煌。明卽玉門關也。

范書耿恭傳。恭母先卒。及恭自車師還。追行喪制。有詔使五官中郎將齋牛酒釋服。李賢注。據東觀記。馬嚴也。

范書岑彭傳。更始遣立威王張卬與將軍徭偉鎮淮陽。偉反擊走卬。彭引兵攻偉。破之。李賢注。東觀記。

徭作淫。

范書蓋延傳。蘇茂周建將賁休舉蘭陵城降。董憲聞之。自郟圍休。帝敕曰。可直往擣郟。則蘭陵必自解。李賢注。東觀記。擣作擊。

范書耿純傳。真定王劉揚造作讖記。欲以惑衆。建武二年。遣純持節行赦。令於幽冀。密勒收揚。純至真定時。揚弟林邑侯讓及從兄細。各擁兵萬餘人。李賢注。東觀記。續漢書。細並作紺。

范書任光傳。更始之雒陽。以光爲信都太守。及王郎起。郡國皆降之。光獨固守。廷掾持王郎檄詣府。白光。李賢注。東觀記。扶柳縣廷掾。

范書任隗傳。隗子屯徙封西陽侯。屯卒。子勝嗣。李賢注。東觀記。勝作騰。

范書王常傳。更始西都長安。以常行南陽太守事。令專命誅賞。李賢注。東觀記曰。誅不用命。封拜有功。范書王常傳。又別率騎都尉王霸共平沛郡賊。李賢注。東觀記曰。沛郡賊苗虛也。

范書李通傳。通建武二年封固始侯。十八年卒。子音嗣。音卒。子定嗣。定卒。子黃嗣。黃卒。子壽嗣。李賢注。東觀記。黃字作箕也。

范書竇融傳。王莽居攝中。爲強弩將軍司馬。東擊翟義。還攻槐里。以軍功封建武男。李賢注。東觀記。續漢書並云寧武男。

范書竇融傳。酒泉太守竺曾。以弟報怨殺人而去郡。李賢注。東觀記曰。曾弟嬰報怨。殺屬國侯王印等。曾慙而去郡。

范書來歙傳。歙父仲。哀帝時爲諫大夫。李賢注。東觀記。仲作沖。

范書來歙傳。建武十三年。帝嘉歙忠節。復封歙弟由爲宜西侯。李賢注。東觀記曰。宜西鄉侯。

范書馬援傳。建武十一年。璽書拜援隴西太守。時朝臣以金城破。羌之西。塗遠多寇。議欲棄之。援不可。帝然之。於是詔武威太守。令悉還金城客民。李賢注。東觀記曰。梁統也。

范書梁冀傳。初冀父商獻美人。友通期於順帝。李賢注。東觀記。友作支。

范書馮勤傳。勤孫由。尙平安公主。李賢注。章帝女也。東觀記作安平。皇后紀又云。由尙平邑公主。紀傳不同。未詳孰是。

范書馮衍傳。衍作顯志賦曰。嬖子反於彭城兮。爵管仲於夷儀。李賢注。嬖字。呂忱音仕。春反。勉也。東觀記作譏字。此雖作嬖。亦譏刺意。衍賦又曰。款子高於中野兮。遇伯成而定慮。李賢注。東觀記。高字作喬。謂仙人王子喬也。衍賦又曰。伏朱樓而四望兮。採三秀之華英。李賢注。東觀記及衍集。秀字作奇。英字作靈。本賦下文云。食五芝之茂英。此若是芝。不宜重說。但不知三奇是何草也。范改奇爲秀。恐失之矣。衍賦又曰。捷六枳而爲籬兮。築蕙若而爲室。李賢注。捷立也。枳。芬木也。晏子曰。江南爲橘。江北爲枳。枳



芳而多刺。可以爲籬。此云六枳。東觀記作八枳。案周書小開篇曰。嗚呼。汝何敬非時。何擇非德。德枳維大人。大人枳維公。公枳維卿。〔案〕今本汲冢周書作大人。卿枳維大夫。大夫枳維士。登登皇皇。維在國枳。〔案〕今周書作枳維。卿維無維。公公枳四字。八與東觀記同。

范書丁鴻傳。建初四年。徙封魯陽鄉侯。李賢注。東觀記曰。魯陽鄉。在尋陽郡也。〔案〕范書郡國志。揚州廬江郡有尋陽縣。各州所部。無郡名。尋陽者。魯陽亦縣名。荆州南陽郡。此疑有誤。

范書丁鴻傳。竇憲擅權。鴻因日食上封事。曰。人道悖於下。效驗見於上。問者月滿先節。過望不虧。此臣驕溢背君。專功獨行也。李賢注。月滿先節。謂未及望而滿也。東觀記亦作先節。俗本作失節。誤也。

范書班超傳。建初八年。疏勒王忠反。超攻忠。康居遣精兵救之。超不能下。時月氏新與康居婚。超乃使月氏王曉示康居王。康居王乃罷兵。執忠以歸其國。後三年。忠說康居王借兵還居損中。遣使詐降於超。超僞許之。忠從輕騎詣超。超斬之。李賢注。損中。東觀記作頓中。續漢及華嶠書並作損中。本或作植。未知孰是。

范書鄧彪傳。元和元年。策罷太尉鄧彪。詔河南尹遣丞存問。常以八月旦奉羊酒。李賢注。東觀記曰。賜羊一頭。酒二石也。

范書魯恭傳。和帝末。下令麥秋得案驗薄刑。而州郡因此遂盛夏斷獄。永初九年。恭上疏諫曰。案易五月姤用事。經曰。后以施令。誥四方。李賢注。東觀記曰。五月姤卦用事。姤卦巽下乾上。初六一陰爻生。五月之卦也。

范書段熲傳。熲追羌出橋門。至走馬水上。尋聞虜在奢延澤。乃將輕兵兼行及賊。擊破之。李賢注。東觀記。熲傳云。出橋門谷。